

THE FIRST EPISTLE OF PAUL THE APOSTLE TO THE CORINTHIANS

1 ¹ Shíí, Paul, Jesus Christ binal'a'á nshłįįgo Bik'ehgo'ih'nań háshít'įįgo shí'dokéed, ła'íí nohwik'isn Sosthenes, ² Inashood Corinthgee ha'ánáńséhíí bich'į' k'e'iilchii, áí Christ Jesus biláhyú godilzįhgo ádaat'eego ádaabi'deszaa, Bik'ehgo'ih'nań báhadaadeszaahíí daalehgo daabi'dokéed, ła'íí dahot'éhé Jesus Christ nohweBik'ehń bizhi' biláhyú daayokaqahíí dawa bich'į' k'e'iilchii, áń dabíí beBik'ehń ła'íí néé nohweBik'ehń nłįį: ³ Bik'ehgo'ih'nań nohwiTaa hik'e Jesus Christ nohweBik'ehń bits'á'dí' ilgoch'oba'íí ła'íí ilch'į'gont'ééhíí bee nohwich'į' goz'ąą le'. ⁴ Bik'ehgo'ih'nań bilgoch'oba'íí Jesus Christ biláhyú nohwaa yiné'híí bighą dábik'ehń oshkaqahgo nohwá ba'ihénsį; ⁵ Áń dawahá yee nohwich'onii, yati' yee nohwich'onii, nohwigoyą' ndi nohwá ágółsį; ⁶ Áík'ehgo Christ baa nadaagohiilni'íí nohwitahyú ndzilgo áyíłsį; ⁷ Áík'ehgo yaaká'dí' nohwaa hi'né'íí doo ła' binohdįh da; Jesus Christ nohweBik'ehń nadáhíí biba' ádaanoht'eedá: ⁸ Bik'ehgo'ih'nań nołdzilgo ánohwiksį doleel danágódzáázhi', áík'ehgo Jesus Christ nohweBik'ehń nadáhíí bijįi doo nt'é bee nohwaa dahgoz'ąą da doleel. ⁹ Bik'ehgo'ih'nań da'ánííyú át'éé, áń biYe' Jesus Christ nohweBik'ehń bił hł daanohdlįįgo nohwich'į' ánniid. ¹⁰ K'adíí nánohwoshkaqah, shik'ííyú, Jesus Christ nohweBik'ehń bizhi' biláyú dálełt'eego yádaati' doleelgo, nohwitahyú doo ilts'á' ádaanoht'ee da doleelgo: áídá' nohwiini' dálełt'eego ła'íí dálełt'eego natsídaahkeesgo dałaházhi' be'ádaanoht'ee le'. ¹¹ Shik'ííyú, ilch'į' nanádaagonołkaad łaą, Klóe yił naháztaaníí shił nadaagolni'. ¹² Gádishniigo ádishnii, ła', Shíí Paul zhińéé nshłįį; ła'íí, Shíí Apółlos zhińéé nshłįį; ła'íí, Shíí Céphas zhińéé nshłįį, ła'íí, Shíí Christ zhińéé nshłįį, daadohni łaą. ¹³ Ya' Christshą' dákwiíhi daahoiikaqah néé? Ya' Paul tsį'ılna'áhi nohwá bíheskał néé? Ya' Paul bizhi' bee baptize ádaanoht'ee néé? ¹⁴ Bik'ehgo'ih'nań ba'ihénsį, doo ła' baptize ádaanoht'ee da, Crispus hik'e Gáius zhą; ¹⁵ Baptize

ánohwishlaayúgo dánko dahadín gánii, Dabíí bizhi' yee baptize ágoł'íi.
 16 Áídá' Stéphanas bił daagolíníí baptize ashłaa ałdó': ba'ashhah ła' baptize ashłaa shihíí doo bígonsj da. 17 Christ doo baptize ash'íigo shinł'a' da, áídá' yati' baa gozhóni baa nagoshni'go shinł'a': doo yati' goyááníí bee yashti' da, áík'ehgo yashti'yúgo dánko tsj'ılna'áhi baa na'goni'íí doo nt'é áile' da doleel ni'. 18 Tsj'ılna'áhi baa na'goni'íí ch'á'onehezdeehíí bich'ı'yúgo déba'odlohé; áídá' néé hasdáhiikaihíí nohwich'ı'yúgo Bik'ehgo'ihı'nań binawod at'éé. 19 Bek'e'eshchiiníí gáníigo, Nnee daagoyáni bigoyą' da'adıhgo ádaashłe' doleel, nnee bił ıdaagoziníí ałdó' doo bił ıdaagozıh dago ádaashłe' doleel. 20 Nnee goyáni n'íí hayú lán? Begoz'aaníí ye'ik'e'ılchıhi n'íí hayú lán? Ni'gosdzán biká' ágot'eehíí ye'agodet'áhi n'íí hayú lán? Díí ni'gosdzán biká' igoyą'íí, Bik'ehgo'ihı'nań doo nt'é dago áyíılaahi at'éé. 21 Bik'ehgo'ihı'nań góyáągo ngonłchıí lék'ehíí k'ehgo ni'gosdzán biká' nnee dabíí bigoyą'íí bee Bik'ehgo'ihı'nań ch'éh yıdaagoksıh, áídá' yati' baa gozhóni yaa yałtı'íí, ni'gosdzán biká' nnee bich'ı'yúgo doo nt'é da ndi, biláhyú da'odlaanıí hasdáhi'niıłgo Bik'ehgo'ihı'nań ngon'áą. 22 Jews daanlíni godiyıhgo be'ígózinihíí yıká hádaat'ıi, ła'ıí Greeks daanlíni kogoyą' zhá yıká daadéz'ıi: 23 Áídá' nééhíí Christ tsj'ılna'áhi bíheskałıí baa nadaagohiılni', áí Jews daanlíni bidáh sizıj, Greeks daanlíni bich'ı'yúgo déba'odlohé; 24 Áídá' Bik'ehgo'ihı'nań bich'ı' ádaanniidíí, Jews daanlíni ła'ıí Greeks daanlíni dawa yich'ı'yúgo Christ, Bik'ehgo'ihı'nań binawodıí at'éé, ła'ıí Bik'ehgo'ihı'nań bigoyą' at'éé. 25 Bik'ehgo'ihı'nań bigoyą'íí, ni'gosdzán biká' nnee bich'ı'yúgo déba'odlohé ndi, nnee bigoyą'íí yıtisgo goyáą; ni'gosdzán biká' nnee bich'ı'yúgo Bik'ehgo'ihı'nań doo nalwod da ndi, nnee binawodıí yıtisgo nalwodhi at'éé. 26 Shik'ıyú, Bik'ehgo'ihı'nań nohwich'ı' ádaanniidíí baa natsıdaahkees; doo hołąago nnee bigoyą' bee daagonohsą da, doo hołąago dák'a'ádaanoht'ee da, doo hołąago ızisgo ágot'ee zhińéego gosolıı da: 27 Ndi Bik'ehgo'ihı'nań ni'gosdzán biká' nt'é doo góyáą dahíí hayiheznıl, daagoyááníí ıdaayádaandzıgo áile'híí bighą; ła'ıí Bik'ehgo'ihı'nań doo daanłdzıl dahíí hayiheznıl, nadaalwodıí ıdaayádaandzıgo áile'híí bighą; 28 Ni'gosdzán biká' doo ızisgo ádaat'eego daagozlıiníí, ła'ıí daach'ich'ółaháhıí Bik'ehgo'ihı'nań hayiheznıl, doo begonáh dahíí hayiheznıl, dząagee begoz'aaníí doo nt'é dago ch'ı'nah áile'híí bighą; 29 Áík'ehgo nnee doo ła' Bik'ehgo'ihı'nań binadzahgee ıda'odlıí da doleel. 30 Áídá' Bik'ehgo'ihı'nań ánát'ıigo Christ Jesus bił dałá'á daanołıı, án biláhyú Bik'ehgo'ihı'nań daagondzáągo ádaanohwizłaa, dávik'ehyú ádaant'ee, ła'ıí godilzıhgo ádaant'eego ádaanohwizłaa, án biláhyú ałdó' hanádaanohwidihez'nil: 31 Bek'e'eshchiiníí gáníihíí k'ehgo, Hadín ıda'odlıhíí nohweBik'ehń yee ıda'odlıí le'.

2 1 Shik'ıyú, nohwaa niyáádá' Bik'ehgo'ihı'nań baa na'goni'íí ni'gosdzán biká' yati' dénzhóné ła'ıí kogoyą'íí doo bee nohwich'ı' yashti'go niyáá da. 2 Áídá' nohwıł nashkai n'dá' Jesus Christ zhá, tsj'ılna'áhi bíheskał

n'íí, baa yashti'go shiini' łashłaa ni', ła'ihíí doo nt'é da. ³Doo ndzil dago, nesdzidgo, ła'íí dážhó deshtłidgo nohwił nashkai ni'. ⁴Shiyati'íí ła'íí na'goshni'íí nnee goyáni biyati' ích'í' goltsódi doo bee yashti' da ni', ndi Holy Spirit na'iziidgo ła'íí binawod ch'í'nah ánsihgo yashti' ni': ⁵Áík'ehgo nohwi'odłá' nnee bigoya'íí bich'í'zhin'éégo doo bada'ohłíí dago, ndi Bik'ehgo'ihí'nań binawodíí bada'ohłíí. ⁶Nohwitahyú nnee Holy Spirit bee báyán daasiliinií bich'í' igoya' bee yádaahiilti', doo díí goldohíí bits'á'dí' igoya'íí da, ła'íí ni'gosdzán biká' nadaant'aahíí bigoya'íí doo bee yádaahiilti' da, áí doo nt'é daaleeh da: ⁷Áídá' Bik'ehgo'ihí'nań bigoya' doo bígózi da n'íí, nanł'í'íí bee yádaahiilti', áí Bik'ehgo'ihí'nań ni'gosdzán dabintsédá' ngonłchíígo yengon'áá lék'ehíí, áí bee Bik'ehgo'ihí'nań bits'á'dí' anáyet'iinií biyi' bił daandłií doleełhíí bighą: ⁸Áí díí ni'gosdzán biká' nadaant'aahíí doo ła' yígółsi da: yídaagolsiyúgo nohweBik'ehń bits'á'dindłáád nłni tsj'ihna'áhi doo yídaayokłá' at'éé da. ⁹Bek'e'eshchiinií gánííhíí k'ehgo at'éé, Konaá doo yo'íi dahíí, kojaa doo idits'ag dahíí, ła'íí nnee bijíí yune' doo hwahá be'ogowáh dahíí, Bik'ehgo'ihí'nań hadíí yił daanzhooníí yá łayiiláa, nii. ¹⁰Áídá' Bik'ehgo'ihí'nań biSpirit bee nohwich'í' ch'í'nah áyíłłaa: Holy Spirit dawahá yinel'íí, Bik'ehgo'ihí'nań bits'á'dí' doo bígózi dahíí ye'at'ééhíí ndi. ¹¹Hadín nnee nliinií nnee ye'at'éhi yígółsi? Nnee biyi'siziinií zhą; da'áík'ehgo Bik'ehgo'ihí'nań ye'at'éhi nnee doo ła' yígółsi da, dabíí biSpirit zhą. ¹²Áík'ehgo ni'gosdzán biká'gee spirit benagowahíí doo nohwaa hi'né' da, ndi Holy Spirit Bik'ehgo'ihí'nań bits'á'dí'hi nohwaa hi'né'; dant'éhéta Bik'ehgo'ihí'nań nohwaa ch'oba'go nohwaa yiné'íí bídaagonłzi doleełhíí bighą. ¹³Áí ałdó' bee yádaahiilti', doo yati' nnee bigoya' íłch'ígó'aahíí bee da, ndi yati' Holy Spirit nohwił ch'ígó'aahíí bee yádaahiilti'; Bik'ehgo'ihí'nań bits'á'dí'go ágot'eehíí yaaká'dí' yati'íí bee nłt'éégo ch'í'nah ágohiidle'. ¹⁴Áídá' nnee Bik'ehgo'ihí'nań biSpirit doo ye'at'éé dahíí Bik'ehgo'ihí'nań biSpirit bits'á'dí' ágot'eehíí doo náidiné' da: bíí bich'í'yúgo déba'odłohé: doo yígonółsi at'éé da, Holy Spirit binkááyú zhą yígółsihíí bighą. ¹⁵Ndi hadín Holy Spirit ye'at'éhi dawahá yígółsi, áídá' dabíí nnee doo Holy Spirit ye'at'éé dahíí doo yígółsini at'éé da. ¹⁶Hadínshą' nohweBik'ehń binatsekeesíí yígółsi, bił ch'ígó'aah doleełgo? Doo hadín da. Áídá' néé Christ binatsekeesíí bídaagonłzi.

3 ¹Shik'íiyú, Holy Spirit be'ádaanoht'eehíí k'ehgo doo nohwich'í' yáoshti' at'éé da ni', ndi ni'gosdzán be'ádaanoht'eehíí k'ehgo, ánígo ínashood daasoljihíí bighą mé' daanołhííhíí k'ehgo nohwich'í' yashti' ni'. ²Ibe' nohwá náda'siłsiidhíí k'ehgo yati' dabígóziníí bee nohwich'í' yashti' ni', itsj'íí dah, áí yati' nyee'íí at'éé: doo hwahá bídaagonółsih dahíí bighą doo bee nohwich'í' yashti' da ni', dak'ad ndi doo bídaagonółsi da. ³T'ah ni'gosdzán biká' ágot'eehíí be'ádaanoht'ee, doo Holy Spirit be'ádaanoht'ee da: nohwitahyú ła' bíyééhíí ídáhadaaht'íí, íłch'í' daashonkee, ła'íí íłts'á'zhí' daahohkah, áí bighą t'ah ni'gosdzán biká' ágot'eehíí be'ádaanoht'ee, ła'íí ni'gosdzán biká' nneehíí k'ehgo t'ah nadaahkai go'íí. ⁴Ła'

gáníidá, Shíí Paul zhiñéé nshíí; ła'íí, Shíí Apollos zhiñéé nshíí, nni; álk'ehgo ni'gosdzán biká' ágot'eehíí be'ádaanoht'ee go'íí. ⁵Paulhííshq' hadín? Apollosííshq' hadín? Nada'iziidíí biláhyú da'osodlaqádíí zhá ndlíí, nohweBik'ehń née dántíígeee binasdziid nohwaa din'áqáhíí k'ehgo na'idziid. ⁶Shííhí k'ediiláá, Apollosíí yiyaa naná'nttish: ndi Bik'ehgo'ihí'nań deshjeedgo áyíílaa. ⁷Álk'ehgo hadín k'e'dileehíí dagohíí hadín naná'nttishíí doo nt'é nlií da; ndi Bik'ehgo'ihí'nań deshjeedgo áile'íí zhá. ⁸K'e'dileehíí ła'íí naná'nttishíí bílgo dálett'ee: ła'íí nnee daantíígeee binasdziidíí bidená bich'í' nahi'niił. ⁹Née Bik'ehgo'ihí'nań dańa' bíł nada'idziidíí daandlíí: nohwíí Bik'ehgo'ihí'nań k'e'nlááhíí ła'íí nayik'í'iziidíí daanohtíí, Bik'ehgo'ihí'nań bikíh yit'íhíí k'ehgo ádaanoht'ee. ¹⁰Nnee góyáni kíh ágole'íí kíh bit'ááh łedn'aahíí áile', ágát'éeego shíí Bik'ehgo'ihí'nań bíłgoch'oba'íí shaa yiné'íí bik'ehgo nohwi'odla' bit'ááh łedn'aahíí ashłaa, áíd'í' nnee ła' yiká' hadag yit'íh. Áídá' nnee daantíígeee hago't'éeego ágole'íí yaa goyáqá le'. ¹¹Nohwi'odla' bit'ááh łedn'aahíí íłk'idá' ágolzaa, áhíí Jesus Christ, nnee doo ła' ánágódle' at'ée da. ¹²Dahadín díí it'ááh łedn'aahíí biká' ágole'íí, óodo, beshligai, tsée łáqá íłni, ndilchi, t'oh, dagohíí t'oh náhesgani yee hadag ágole'yúgo; ¹³Nnee daantíígeee binasdziidíí ch'í'nah alne' doleeł: kaa yá'it'íí bíjiiígeee kq' bee ch'í'nah hileeh; nnee daantíígeee binasdziidíí hago't'éeéhíí kq' bee bígozih doleeł. ¹⁴Nnee ła' hadag ágolaahíí t'ah goz'ayúgo, bidená bich'í' nahi'niił doleeł. ¹⁵Áídá' nnee ła' binasdziidíí qalnlid lęk'eyúgo, nt'é bich'í' nahi'niił le'at'ée n'íí baa ch'a'one': ndi bíhíí hasdábidleeh, kq' biyi' ch'í'nyááhíí k'ehgo. ¹⁶Bik'ehgo'ihí'nań bikíh biyi' daach'okaqáhíí daanohtííni ádaanoht'eehíí, ła'íí Bik'ehgo'ihí'nań biSpirit nohwiyi' golííhíí bídaagonołsı ya'? ¹⁷Nnee ła' Bik'ehgo'ihí'nań bikíh biyi' daach'okaqáhíí dénch'ogo áyíílaa lęk'eyúgo, Bik'ehgo'ihí'nań da'íłíí hileehgo ábile' doleeł, Bik'ehgo'ihí'nań bikíh biyi' daach'okaqáhíí godiyihíí bigħa, áí kíhíí nohwíí daanohtíí. ¹⁸Nnee doo ła' ích'í' nach'aa da le'. Nohwitahyú nnee ła' ni'gosdzán bigoyá' ye'at'ée ngolníí lęk'eyúgo, áí doo nt'é yígółsiníí k'ehgo ádódle', álk'ehgo goyáqá hileeh. ¹⁹Díí ni'gosdzán biká' igoyá'íí Bik'ehgo'ihí'nań bich'í'yúgo déba'odlohé át'ée: bek'e'shchiiníí gáníí, Nnee daagondzqá daanziníí nadaach'aago nadaagołchi'íí bee Bik'ehgo'ihí'nań daabiljizh. ²⁰Ła'íí gánádi'nii, NohweBik'ehń nnee daagondzqá daanziníí binatsekeesíí yígółsı, doo nt'é bee alne' dago. ²¹Áí bigħa nnee doo ła' bada'okíí da le': dawahá nohwíyéhi ádaat'ee; ²²Paul, dagohíí Apollos, **Cephas**, dagohíí ni'gosdzán, ihí'naahíí, dagohíí da'itsaahíí, dawahá k'adíí daagolíni, dagohíí dawahá begonáhi, dawa nohwíyéhi ádaat'ee. ²³Áídá' Christ bíyéé daanohtíí; Christ-híí Bik'ehgo'ihí'nań bíyéé nlií.

4 ¹Christ yánada'iziidíí ła'íí Bik'ehgo'ihí'nań bits'á'dí' doo bígózı da n'íí nt'éeego daineł'íígo yaa nadaagolní'íí daandlíígo nohwaa nats'íikees le'. ²Álk'ehgo nnee nada'iziidíí binant'a' da'ábiłniiyú ánát'ííłgo goz'áq. ³Nohwíí shaa yádaałti'yúgo, ła'íí nnee aayanáłtihíí shaa yałti' ndi, doo shíł hago't'ée da; shíí ndi doo ídaayashti' da. ⁴Dénch'ého asdzaahíí doo bígonsı da, ndi áí bigħa nt'éeego shich'í' ch'ígowáh doo dishnii da: áídá' nohweBik'ehń zhá shaa yałti'. ⁵Áí bigħa doo hwahá biká' ngowáh dadá' doo aayádaałti' da, nohweBik'ehń nádzáágo zhá, án dawahá godiłhíí biyi'

nanl'i' n'íi got'iizhí' ch'i'nah áidoliit, la'íi nnee bijíi yune' yaa natsídaakesí ch'i'nah áidoliit: áik'ehgo nnee daantíígee nlt'éégo ánádaat'íi lék'eyúgo, Bik'ehgo'ihina, Nlt'éégo ánádaaht'íi ni', daabitnii doleel. ⁶Shik'íyú, shíi hik'e Apollos bitgo nohwe'ídaagono'aah doleelgo nohwich'i' ádaayásiilti; bek'eeshchiinií áníhíi bitisgo nnee doo baa natsídaahkees da doleelgo, la'íi nohwíi nnee doo da'á bee ídaada'ohdlíidá' la'ihíi nohwíi daanchó' da doleelgo. ⁷Hagot'éégo láá lahgo ánt'éégo sínlii? Nt'é láá n'yéhi doo naa hi'né'hi da lán? Naa hi'né' lék'eyúgo, nt'é bighá ída'órdlii? Doo naa hi'né'hí k'ehgo láá ánt'ee. ⁸Ík'idá' dawahá daanohwíyée ya', ík'idá' hadaanoldzil ya', nant'an k'ehgo nadaanoht'aa, daanohwídh ndi: nadaanoht'aahí dázho hásh'tíi, néé ádó' nohwíi nadaant'aa doleelhíi bighá. ⁹Néé, Jesus binal'a'á daandliinií, Bik'ehgo'ihina iké'yú ch'ínohwinil shi nsj, nnee natseedgo bándaaagost'aahí k'ehgo: ni'gosdzán biká' daagolíníi, Bik'ehgo'ihina binal'a'á yaaká'yú daagolíníi, la'íi nnee dawa daanohwine'íígo ádaanohwi'deszaa. ¹⁰Néé Christ bighá nnee déba'odlohé daandlii, nohwihíi Christ binkááyú daagondzā daanohsi; néé doo daandzil dahíi k'ehgo nohwaa nats'íikes, nohwihíi nadaanwod daanohsi; nohwíi nnee daanohwidn'sj, nééhíi daanohwich'ich'o'laa. ¹¹Díi jii t'ah shina' la'íi dibá' daandlii, nohwidiyágé ádaadih, da'adzaayú nanohwida'dindzil, nohwigowa' ádaagodihgo da'ííi nahiikai; ¹²Danéé nohwigan bee nada'idiid: daanohwoch'iid lék'eyúgo bá da'ohiikaqah; nohwiniidaagontsi ndi bich'i' dahdaandloq: ¹³Ncho'go nohwaa yadaaht'íi biyaa gozhóq doleelíi bá hádaaht'íi: ni'gosdzán biká' dawahá ncho'i ch'íideehíi daandliihíi k'ehgo nohwaa nats'íikes, díi jii ndi nohwíi ch'ídaagosdinihíi k'ehgo nohwaa nats'íikes. ¹⁴Díi doo bik'ee ídaayádaanohdzhíi bighá nohwich'i' k'e'eshchii da, áidá' shichagháshé shíi daanzhooníi daanohíigo nohwíi ch'ídaagonsh'aahíi bighá ádaanohwídishnii. ¹⁵Christ bá nohwíi ch'ídaago'aahíi gonenan doo náhóltag dayú gólí'sha' ndi nohwitaahíi da'á: Christ Jesus baa yati' baa gozhóni baa nohwíi nagoshni'go nohwitaa sííi. ¹⁶Ái bighá nádaanohwoshkaqah, shedaat'íi le'. ¹⁷Ái bighá **Timotheus**, nohweBik'ehí biláhyú shizhaazhé shíi nzhoggo ba'oshlíi, nohwich'i' o'a', Christ biláhyú shi'at'e'íi binádaagonozigo áidoliit, dáhot'éhé ha'ánázéhyú be'íhch'igosh'aahíi k'ehgo. ¹⁸Doo nohwaa higháh da daanzhíi bighá la' ídaada'odlíi. ¹⁹Ndi dét'ihégo nohwaa nsháh doleel, nohweBik'ehíi hāt'íyúgo, áik'ehgo ái nnee ídaada'odlíihíi doo biyati' zhá bígonsih da, ndi binawod golíyúgo bígonsih. ²⁰Bik'ehgo'ihina bilat'áhgee begoz'aanií doo dáyati' zhá yee ch'i'nah hit'íi da, binawodíi yee ch'i'nah hit'íi. ²¹Hadíihíi be'ánsht'eego hádaaht'íi? Gish be'idilt'ishé hishtíi'go nohwaa nsháh néé, dagohíi shíi daanohshoggo doo hashishkee dago nohwaa nsháh néé?

5 ¹Nohwitaahíi nant'íi na'ildeehíi be'ádaanoht'eego nohwaa ch'inií, agat'éégo nant'íi na'ildeehíi nnee Bik'ehgo'ihina doo daayokaqah dahíi bitahyú ndi doo hak'e begoz'aq da, kotaa bi'aahíi ko'aago. ²Dázho ídaadołkaqah laq, baa daachag le'at'éhi, díi ye'ánat'íi'íi nohwitaht'íi

ch'ilt'é' doleeł ni'. ³Doo nohwitahyú nashaa da ndi dashiini' zhá bee nohwitahyú nshłj, áík'ehgo shiṇááł ánágot'jłhíí k'ehgo iłk'idá' dí nṇee ánát'jídíí baa yásłti', ⁴Jesus Christ nohweBik'ehń bizhi'íí bee ıła'ádaanoht'eeyú, doo shiṇááł da ndi shiini' bee shiṇááłhíí k'ehgo, Jesus Christ nohweBik'ehń binawod nohwił nłjgo, ⁵Nṇee ágádaahíí Satan baa daadinoh'aah, bits'ı bin'ıdınh doleełhíí bigħa, áík'ehgo biyi'siziiníí hasdágháh doleeł, Jesus nohweBik'ehń nadáhíí bijji. ⁶Ídaada'ohdlíhíí doo nzhqo da. Ya' bán benilzoolé da'ayáhágo ik'áan nást'óodíí dahot'éhé daabındıkołıfıshq' doo bídaagonoısi da née? ⁷Ncho'go ánadaaht'jłhíí nohwitahyú begoz'aaníí bán benilzoolé doo ánıdád' n'ıí yó'odaahné'híí k'ehgo yó'odaagodoh'aah, áík'ehgo ánıdégo ná'ist'oodhíí k'ehgo daateeh, bán benilzoolé da'ádıjho bán alzaahíí k'a'ádaanoht'ee doleeł. **Bitis-hagowáh** n'ıí bee bınádaahiilnıihgo dibeljí bizhaazhé zesdjihíí k'ehgo Christ nohwá zesdjı lék'e: ⁸Áík'ehgo halaq, ıenágodáhgo náda'idıjıhíí da'áík'ehgo begoz'aq le', bán benilzoolé doo ánıdád' be'alzaahíí doo daahiidaq dago, dagohíí bán benilzoolıí k'ehgo natsekes o'nı'híí ıa'ıí ncho'go ágot'eehíí bıł alzaahíí doo daahiidaq dago; áıdád' bán benilzoolé dá'ádıjho bán alzaahíí nádaahiıdjıh le', áı bánhıí nı't'éégo ıa'ıí da'aniigo natsıts'ikeesi golzeego ágot'ınihi. ⁹Nant'ı' nakaihíí doo bıł nahkai da, nohwiłdishnıigo nohwich'ı' k'e'eshıłchıı ni': ¹⁰Áıdád' nant'ı' nakaihıí, dawahá dayúwehégo ıdáhádaat'ıinıí, daan'ıjıhıí, dagohıí k'e'eshchın daayokaqahıí doo ınashood daanljı dahıí doo ádálđishnıi da; áı ádálđishnıi lék'eyúgo, ni'gosdzán bits'á' nohkáhyúgo zhá doo bıł nahkai da doleeł ni'. ¹¹Áıdád' gánohwiłdishnıigo nohwich'ı' k'e'eshchii, Nṇee ıa' ınashood daayıjıihıí nant'ı' naghaa lék'eyúgo, dagohıí dawahá dayúwehégo ıdáhát'ıinıí, k'e'eshchın yokaqahıí, yati' ye'okáahıí, da'ıdlaq nt'ééhıí, dagohıí aháda'ı'niıhıí nljı lék'eyúgo, doo bıł nahkai da; ágádaat'eehıí doo bıł daohsaq da. ¹²Hant'é nashıntł'ogo yánáltihıí ádish'ıjgo doo ınashood daanljı dahıí baa yashti' doleeł? ınashood daanliinıí zhá baa yádaaktı'go goz'aq. ¹³Doo ınashood daanljı dahıí Bik'ehgo'ıhi'nań zhá yánáltihıí nljıgo yaa yádaaktı'. Áík'ehgo nṇee ncho'go ánát'jłhıí nohwıts'á' nołteeh.

6 ¹Nohwıı ıa' dahagot'éégo iłch'ı' gosol'aq lék'eyúgo, doo ıdaa yágosı dago doo ınashood daanljı dahıí binadzahgee ıaa yaktı' née, ınashood daanliinıí binadzahgee zhá ıaa yaktı' le'at'éhi? ²ınashood daanliinıí dahagee ni'gosdzán biká' nṇee yaa yádaaktı' doleełıí doo bídaagonoısi da née? Ni'gosdzán biká' nṇee baa yádaaktı'ıı nohwıdáhyú begoz'aqadá, da'ayáhágo goz'ánihıí baa yádaaktı'go doo bik'eh shohjeed da ya'? ³Bik'ehgo'ıhi'nań binal'a'a yaaká'yú daagolıni baa yádaaktı'ıı nohwıdáhyú begoz'aanıí doo bídaagonoısi da gá? Áı ndi baa yádaahiiltı'dá' ni'gosdzán biká' zhinéégo ágot'eehıí nı't'éégo baa yádaahiiltı' go'ıı. ⁴Dıı ni'gosdzán biká' zhinéégo dant'éhé bigħa ıaa yádaaktı' lék'eyúgo, nṇee ınashood daanlıni doo daidnısi dahıí yaa yádaaktı'go hanádaahnııł née? ⁵Dıı bik'ee ıdaa yádaanohdzıgo

ánohwishl'ęgo ánohwildishnii. Ya' nnee góyáání nohwitahyú doo ła' da née? Doo ła' bik'isyú tił dahnagos'ąagee yaa yatti' doleelí yik'eh sitií da née? ⁶Áídá' nnee ła' bik'isn biłgo łaa yatti'go, aayánáltihí doo inashood daanlii dahí binadzahgee łaa yatti'. ⁷Áík'ehgo nohwitahyú dážhó dégoch'ęgo goz'ąa, aayánáltihí binadzahgee łaa yádaati'hí bighą. Áídá' nt'é bighą doo ch'ík'eh ánánohwił'iji da? Nt'é bighą doo ch'ík'eh nohwich'i' nadaach'aa da? ⁸Áídá' nda'otsiih, Christ biláhyú nohwik'isyú ndi doo bik'ehyú ádaat'iji da, bich'i' nadaach'aa. ⁹Doo bik'ehyú ádaat'ee dahí Bik'ehgo'ihinań bilakt'áhgee begoz'aaní doo itah býéé daaleh dago doo bídaagonońsı da gá? Nohwich'i' na'doch'aa hela: iké' na'idaahí, k'e'eshchín daayokąąhí, nant'i' nakaihí, nnee daanliinií nnee yiłgo doo bik'ehyú ádaat'iji dahí, ¹⁰Da'n'iihí, dawahá dayúwehęgo ídáhadaat'iinií, da'idlaą nt'ééhí, yati' yeda'okaańí, ła'í ahada'i'niihí, díi dawa Bik'ehgo'ihinań bilakt'áhgee begoz'aaní doo itah býéé daaleh da. ¹¹Nohwí ła' ágádaanoht'ee ni: áídá' Jesus nohweBik'ehń bizhi' bee ła'í Bik'ehgo'ihinań daahohiikąąhí biSpirit biláhyú taadaanohti'desgiz, bá hadaanohti'deszaa, ła'í dábik'ehyú ádaanoht'ee daanoht'ido'niid. ¹²Dawahá shá bił ch'ı'otaą ndi doo dawa bee shich'ogo'nií da: dawahá shá bił ch'ı'otaą ndi doo ła' ích'i' shiltsood da áshidilne' da. ¹³Hidán nohwibid bá át'éé, ła'í nohwibid hidán bá át'éé: ndi Bik'ehgo'ihinań da'ála doo nt'é dago áiléh doleel. Nohwits'ihí doo nant'i' na'idahí bá át'éé da, ndi nohweBik'ehń bá át'éé, ła'í nohweBik'ehń binawodí nohwits'ı bá át'éé. ¹⁴Bik'ehgo'ihinań nohweBik'ehń naahi'na'go áyíłaa, née áldó' binawod bee naadaahihii'nahgo ádaanoht'ee. ¹⁵Ya' nohwits'ı Christ bił dała'á daanliigo at'ééhí doo bídaagonońsı da gá? Áík'ehgo ya' Christ bił dała'á nliinií isdzán nant'i' nagháhi bił dała'á ádíshdléh née? Dah, da'anii doo ágát'éé da doleel. ¹⁶Ya' nnee ła' isdzán nant'i' nagháhi ya'ádidiltiigo isdzánhí bił bits'ı dała'á nadleehí doo bídaagonońsı da gá? Gáníigo dahgoz'ąa, Nakihí bits'ı dała'á nádodleel. ¹⁷Áídá' hadín nohweBik'ehń ya'ádidiltiijihí spirit dała'á át'éé. ¹⁸Nant'i' na'idahí bits'ą' nadohkeeh. Nnee ni'ihisiih ła'ihí doo bits'ı yee ni'ihisiih da; áídá' dahadín nant'i' nagmaahí bits'ı yee ni'ihisiih. ¹⁹Ya' nohwits'ihí Holy Spirit nohwiyi' golíinií bikih biyi' daach'okąąhí ádaat'eehí doo bídaagonońsı da gá? Nohwits'ihí Bik'ehgo'ihinań nohwaa yiné'ihí at'éé, doo daanoht'ee da go'ii. ²⁰Łán izliigo nadaanoht'eehezniihi ádaanoht'ee: áí bighą Bik'ehgo'ihinań ízigo at'ééhí ch'ı'nah ádaanońsı, nohwits'ihí ła'í nohwiyi'siziinií bee, áí Bik'ehgo'ihinań býéé.

7 ¹Baa shich'i' k'eda'shołchij n'ii bee nohwich'i' k'e'ná'ishchii: Nnee doo nannee dayúgo bá nłt'éé. ²Áídá' dánko nant'i' nakáhí bighą nnee dała'á daantíige daabí bi'aa golíi le', ła'í isdzáné dała'á daantíige daabí bika' golíi le'. ³Isdzán bika' yił nteesh hat'iiyúgo nneehí doo dah nii da le': ła'í nnee áldó' da'áik'ehgo bi'aa áidoliil. ⁴Isdzán doo daabí bik'ehgo ánát'iji da le', ndi bika' bik'ehgo: nnee áldó' da'áik'ehgo doo daabí bik'ehgo ánát'iji da le', ndi bi'aa bik'ehgo. ⁵Doo iłch'i' a'nohch'i' da, dahagee dáshina' ohkaągeeyúgo

zhá daazhógo ngonoh'aah; áí bikédí'go łaa naht'aash, doo ágáhoht'ííł dayúgo dánko nohwits'í yiká hát'ííníí doo bidag ánoht'ee da doleelhíí bighą Satan nanohwíntaah doleel. 6Díí nohwił ch'ínsh'aahíí bighą nohwich'í' yashti', doo bee nohwá ngonsh'aahgo da. 7Shíí ánsht'eehíí k'ehgo nnee dawa áldó' ádaat'eego hasht'íí. Áídá' nnee dała'á ntíígee bi'at'e'ihíí Bik'ehgo'ihí'nań bits'á'dí' begoz'ąą, ła' nadaaneedá' ła'ihíí doo nadaanee dago. 8Áík'ehgo doo nadaanee dahíí ła'íí isdzáné itsaa daanliiníí gádaabiłdishnii, Shíí k'ehgo doo nadaahnee da ndizhọq. 9Áídá' na'í'neehíí bich'í' doo ích'idildih dayúgo, ch'ík'eh nadaach'inéh ndizhọq: nach'ineehíí shich'í'yúgo doo nht'ée da ndi na'í'neehíí bidázhzhí' ch'ilííyúgo dánko nant'í' ch'idigháhíí itisgo doo nzhọq da. 10Áídá' nadaaneehíí gádaaldishnii, doo shíí da, nohweBik'ehń gáyitnii, Isdzán bika' yíł ikk'ínát'aash hela: 11Áídá' yíł ikk'ínát'aazh lẹk'eyúgo, daazhógo naghaa le', dagohíí bika' yaa nánódáh: ła'íí nnee bi'aa yíł ikk'ínát'aash hela'. 12Ła'ihíí shíí gádaaldishnii, nohweBik'ehń doo gáníí da, Ła' nnee Christ biláhyú nohwik'isn, bi'aa doo da'odlaą da ndi, bika' odláni yíł golíígo bił dábik'ehyúgo, yó'ayółt'e' hela'. 13Ła'íí isdzán odláni bika' doo odlaą da ndi yíł golíígo bił dábik'ehyúgo yó'ayółt'e' hela'. 14Nnee doo odlaą dahíí bi'aa bi'odla'íí bighą Bik'ehgo'ihí'nań bits'á'dí'go hakodilne'íí bee bich'í' goz'ąą, ła'íí isdzán doo odlaą dahíí bika' bi'odla'íí bighą Bik'ehgo'ihí'nań bits'á'dí'go hakodilne'íí bee bich'í' goz'ąą áldó': áík'ehgo nohwichagháshé da'ch'odlaązhí' bił da'otag doleel, doo ágát'ée da lẹk'eyúgo doo da'ch'odlaązhí' bił da'otag da doleel ni'. 15Ła' doo odlaą dahíí nádilwod lẹk'eyúgo ch'ík'eh nádilgheed. Christ biláhyú nohwik'isn dagohíí nohwilah, bi'aa dagohíí bika' bits'á' nýááyúgo doo daabihest'ọq da, áídá' Bik'ehgo'ihí'nań, Nkegohen'ąągo nahkai, daanohwiłnii. 16Isdzán, ínashood níłni, díí baa natsínkees, ninkááyú nika' dánko hasdábí'didołteel. Nnee, ínashood níłni, díí baa natsínkees, ninkááyú ni'aa dánko hasdábí'didołteel. 17Nnee daantíígee Bik'ehgo'ihí'nań baa daagodez'ąąhíí k'ehgo hikaah le', nohweBik'ehń bich'í' ánniidíí k'ehgo yikísk'eh hikaah le'. Ádishniiigo ínashood ha'ánálséh nagozníłíí dawa baa goni'ąą. 18Nnee ła' Bik'ehgo'ihí'nań bich'í' ánniidá' ikk'idá' **circumcise** ábi'delzaa lá née? Áí shidíí doo k'ena'óshdéh nzi da le'. Nnee ła' Bik'ehgo'ihí'nań bich'í' ánniidá' doo circumcise ábi'delzaa da lá née? Áń circumcise ábi'dolne' hela'. 19Circumcise áko'delzaahíí dagohíí doo circumcise áko'delzaa dahíí doo hago'at'ée da, Bik'ehgo'ihí'nań yengon'ááníí bikísk'eh ách'ít'éyúgo zhá íłíí. 20Nnee daantíígee Bik'ehgo'ihí'nań bich'í' ánniidá' nt'é binasdziid lán shí n'íí dayúweh nayik'í'iziid le'. 21Ya' nich'í' ánniidá' isnáh níłni lą née? Áí doo nił hago'at'ée da le': ndi ná ch'í'otąą lẹk'eyúgo ch'ínánádáh. 22Dahadín nohweBik'ehń bich'í' ánniidá' isnáh nlii ndi, nohweBik'ehń binadzahgee doo isnáh níłni at'ée da: áídá' dahadín bich'í' ánniidá' doo isnáh nlii da ndi, Christ bi'isna' silíí. 23Łán izłiigo nadaanohwi'dehezniihi ádaanoht'ee; nnee zhá bi'isna' nádaahdleeh hela'. 24Shik'ííyú, nohwich'í' ánniidá' daanohtíígee hago't'éego nohwich'í' goz'ąą lẹk'eyúgo, da'ágádaanoht'eego Bik'ehgo'ihí'nań bił daanohłi le'. 25K'adií ch'ikíí

doo hwahá nnéh dahíí baa yashti', doo nohweBik'ehń yegos'aaníí bee da, ndi nohweBik'ehń biłgoch'oba'íí shaa yiné'go shada'ołíigo áshíílaahíí bigha bee yashti'. ²⁶Nagont'ogíí bengonyááhíí bigha dahadín da'at'ééhíí k'ehgo naghhaago bá nzhqo shí nsí. ²⁷Ya' nannee née? Hagot'éégoshq' bił k'ínásh't'aazh doo núnzi da. Ya' doo nannee da née? Doo isdzán biká dín'jii da le'. ²⁸Áída' nńnaayúgo, doo isínłsii da; ła'íí na'ilíhn nńáayúgo doo isiih da. Áída' hadíí lił nńádaasaaníí ni'gosdzán biká' nagont'ogíí bee bich'í'í nagoz'aq doleel: áí bits'á'zhí' daanohwoshq' hasht'íí. ²⁹Shik'ííyú, goldohgo nohwá ngont'aaníí hileehgo ayáhágo godziih, nohwíkdishniiigo ádishnii: áík'ehgo kodí' godezt'íigo hadíí bí'aa daagolíníí, bí'aa doo daagolíí dahíí k'ehgo ádaat'ee le', bí'aa doo nohweBik'ehń bitisgo yaa natsídaakees dago; ³⁰Hadíí daachagíí doo daachag dahíí k'ehgo ádaat'ee le', nt'é bigha daachagíí doo itisgo yaa natsídaakees dago; hadíí bił daagozhóóníí doo bił daagozhqó dahíí k'ehgo ádaat'ee le'; hadíí nada'ihńiihíí doo nt'é daabíyééhíí k'ehgo ádaat'ee le'; ³¹Ła'íí hadíí ni'gosdzán biká' ágot'eehíí nabik'í'iziidíí, doo áí zhá nabik'í'iziidhíí k'ehgo ádaat'ee da le', díí ni'gosdzán biká' benagowaahíí bech'ígowáhi at'ééhíí bigha. ³²Doo nohwiini' łąq dago nohwá hasht'íí. Hadín doo nanee dahíí nohweBik'ehń bich'í'í zhinéégo ágot'eehíí zhá yaa natsekeesgo, nohweBik'ehń hagot'éégo yił goyíłshqógo áile'íí yaa natsekees: ³³Áída' nnee naneehíí ni'gosdzán bich'í'í zhinéégo ágot'eehíí zhá yaa natsekees, hagot'éégo bí'aa yił goyíłshqógo áile'go yaa natsekees. ³⁴Isdzán naneehíí hik'e isdzán doo nanee dahíí biłgo doo łet'ee da. Isdzán doo nanee dahíí nohweBik'ehń bich'í'í zhinéégo ágot'eehíí yaa natsekees, hagot'éégo bits'í hik'e biy'isiziiníí godilzihgo at'éégo áyíłsi doleelgo: áída' isdzán naneehíí ni'gosdzán bich'í'í zhinéégo ágot'eehíí yaa natsekees, hagot'éégo bika' yił goyíłshqógo áile'íí yaa natsekees. ³⁵Díí daanohwíí nohwá nzhqogo yashti'; doo nohwishjizhgo da, ndi nohwá nńt'ééhíí bigha, doo nakigo nohwiini'go da nohweBik'ehń bá nada'ohsiidhíí bigha. ³⁶Nnee ła' bitsi' doo nniinéh hát'íí dahíí bigha, doo sitsi' bich'í'í nńt'éégo ánsht'ee da, nzi lək'eyúgo, ła'íí na'ilíhn bayánzhí' dahiyaayúgo, ła'íí na'i'neehíí bá nńt'éé nziyúgo, áí doo hago'at'éé da, doo nchq'go ánát'ííł da, ch'ík'eh nniinéh ndi nzhqo. ³⁷Áída' nnee ła' nńdzilgo tsídezkeezgo, ła'íí doo nt'é daabíni'ayúgo, dabíí hát'íiníí yitis nłiiigo, bitsi' doo nniinéh dago biini' łąyiláa lək'eyúgo nńt'éégo adzaahi at'éé. ³⁸Áík'ehgo nnee bitsi' ła' nnee yaa yinłt'ííyúgo nńt'éégo adzaa; áída' doo ła' nnee yaa yinłt'íí dayúgo itisgo nńt'éégo adzaa. ³⁹Isdzán bika' danihi'náázhi' begoz'aaníí bee híbi'dezt'łqo, ndi bika' daztsayúgo daazhógo naghha, dabíí hát'íiníí yił niinéh doleel; nohweBik'ehń bił dábił'ehyúgo zhá. ⁴⁰Ndi itsaa nliiníí doo nnaná'náá dayúgo zhá bił gozhqó shí nsí: Bik'ehgo'ihí'nań biSpirit áík'ehgo nashitsiyíłkees shí nsí.

8 ¹K'e'eshchín daach'okąqhgo hidán baa hi'niił n'íí baa yashti': daanohwigha hidán doo godiyih dago bídaagonłzi. Ndi shí itisgo gonsaq ch'inziyúgo itisgo da'ích'ídolteeł, áída' iłgoch'oba'íí ínashood nńdzilgo ábile'. ²Dahadín shí itisgo gonsaq ch'inziníí, bígoch'íłsi le'at'éhi

doo ła' bígoch'ih̄s̄j da. ³Áídá' dahadín Bik'ehgo'ih̄i'nān bił nzh̄oq̄yúgo, án Bik'ehgo'ih̄i'nān bígól̄s̄j. ⁴Áík'ehgo k'e'eshchín daach'ok̄āq̄hgo hidán baa hi'nīił n'íi daach'iȳāq̄híi baa yashti', k'e'eshchín doo da'anīi hīnaa dago bídaagonl̄z̄i, ła'íi Bik'ehgo'ih̄i'nān dała'á zh̄á gól̄ínīi áłdó' bídaagonl̄z̄i. ⁵Yaaká'yú ła'íi ni'gosdzán biká'yú dant'éheta daach'ok̄āq̄híi, gods daaholzéhi, łāá ndi, (bich'í' daach'ok̄āq̄híi łāágo, ła'íi nadaant'án łāágo daagol̄íi ndi,) ⁶Néé Bik'ehgo'ih̄i'nān dała'á nohwá gól̄íi, nohwiTaa, án bits'á'dí' dawa daagol̄íi, ła'íi án bá daahin'naa; ła'íi nohweBik'eh̄n dała'á gól̄íi, Jesus Christ, án binkááyú dawa daagol̄íi, ła'íi án binkááyú daahin'naa. ⁷Da'ágát'éé ndi ínashood doo dawa ái yídaagoł̄s̄j da: áídá' kú begonyaazh̄i' ła' k'e'eshchín zh̄á daach'ok̄āq̄híi yídaagoł̄s̄j ni'; ái hidán godiȳhgo at'éé daanz̄igo hidán k'e'eshchín daach'ok̄āq̄hgo baa hi'nīił n'íi daayiȳāyúgo, yunáásyú itisgo doo daanł̄dzil naz̄i da daaleeh. ⁸Doo hidán Bik'ehgo'ih̄i'nān bit'ahgo nohwinon̄íił át'éé da: daahiidaq̄yúgo doo ái bigh̄a Bik'ehgo'ih̄i'nān binadzahgee itisgo daanj̄oq da, dagohíi doo daahiidaq̄ dayúgo doo ái bigh̄a Bik'ehgo'ih̄i'nān binadzahgee itisgo daancho' da. ⁹Áídá' ídaa daagonohdz̄a, nohwi'odla' daanł̄dzillhíi bigh̄a hidán k'e'eshchín baa hi'nīił n'íi daahohyaq̄yúgo, dánko n̄nee bi'odla' doo daanł̄dzil dahíi ła' nageehgo ádaah̄e'. ¹⁰Ni, hidán doo godiȳhgo at'éé da bígonł̄s̄ni, k'e'eshchín náda'ok̄āq̄hé yun̄e' nnaago n̄nee ła', bi'odla' doo nł̄dzil dahíi no'iȳyúgo, dánko doo hago'at'éé łaq̄ nz̄igo bíi áłdó' yiȳāq̄ doleek; ¹¹Áík'ehgo shí itisgo gons̄a n̄z̄ihíi bik'izh̄i' ái n̄nee bi'odla' doo nł̄dzil dahíi dánko ch'a'otł̄z̄h, án Christ biláhyú nik'isnhi, Christ bá daztsáni. ¹²Nohwik'isn bi'odla' doo nł̄dzil dago doo bik'ehyú ágot'eehíi dábik'ehyú át'éé nz̄igo ádaabinoł̄s̄igo bich'í' ncho'go ánadaaht'iȳł̄go Christ bich'í' ncho'go ánadaaht'iȳł̄ hileeh. ¹³Áík'ehgo hidán hish̄āq̄híi bigh̄a shik'isn nanago'yúgo, dánnágódz̄aázh̄i' doo its̄i' náoshdaq̄ at'éé da, shik'isn doo nanashḡeeh hasht'iȳi dahíi bigh̄a.

9 ¹Ya' doo Christ binal'a'á itah nsh̄ł̄j da gá? Ya' doo dawahá shá bił ch'í'ot̄āq̄ da gá? Ya' doo Jesus Christ nohweBik'eh̄n biláhyú shinasdziid daanohł̄j da gá? ²Ła' bich'í' doo Christ binal'a'á nsh̄ł̄j dayúgo, nohwíi nohwich'í' ái nsh̄ł̄j go'iȳi: nohweBik'eh̄n biyati' bee nohwich'í' yashti' n'íi biláhyú hasdánohwido'n̄ilhíi bigh̄a Christ binal'a'á nsh̄ł̄jgo sh̄ígózi. ³Díi bee ádáyashti', hadín nashídił̄kidyúgo: ⁴Ya' néé Christ binal'a'á daandliiníi da'iid̄āq̄go doo nohwá goz'ą̄a da gá? ⁵Ya' isdzán ínashood daanlíni bił ndaan'nehgo bił nahiikaigo doo nohwá goz'ą̄a da gá, ła' nadaal'a'ihíi, nohweBik'eh̄n bik'isyú, hik'e **Céphas** ádaadzaahíi k'ehgo? ⁶Ła'íi ya' shíi hik'e Barnabas zh̄á behih̄i'naahíi bigh̄a doo na'iz̄dziid da ndi doo hago'at'éé dago nohwá goz'ą̄a gá? ⁷Hadín dabíi na'iz̄n̄ilgosh̄a' siláada nł̄j? Hadín dahts'aa k'eidnł̄áago binest'ą'íi doo yiȳāq̄ dash̄a? Hadín dibeh̄ł̄j yinádez'iiníi bibe' doo yidl̄a dash̄a? ⁸Ya' dashíi zh̄á ádish̄nīi gá? Bik'ehgo'ih̄i'nān yegos'aanīi áłdó' áníi go'iȳi. ⁹Bik'ehgo'ih̄i'nān yegos'aanīi Moses binkááyú nohwich'í' alzaahíi gán̄iigo bek'e'eshchij, łch'ih̄gee

magashi t'oh naghái nyí'í'eesíí doo bizé' na'ilt'éh da, nii. Ya' díí dá magashi zhá yaa natsekeesgo aníí née? ¹⁰Dagohíí née nohwaa natsekeesgo aníí née? Da'aníí nohwá bek'e'eshchíi: nnee nágodzjizíí nest'án nyohohíigo nágodzjiz, la'íí ilch'ihíí áldó' t'oh naghái nyohohíigo at'íí. ¹¹Áík'ehgo nohwitahyú Holy Spirit bits'á'dí' nlt'ééhíí bee nohwil ch'ídaagosíit'áqdá, ni'gosdzán biká' nandeehíí nohwaa daanojnë'yúgo, ya' nohwil dík'eh ádaagot'ee née? ¹²La' nnee dant'éhéta bídaandíhíí nohwaa daanojnë' daanohwilniigo bá goz'ayúgo, ya' neéhíí doo ágádaan'niigo nohwá goz'aa da gá? Da'ágát'éé ndi doo hak'i ída'onkeed da ni', Christ baa yati' baa gozhóni bidáhgee doo nadaagont'og da doleełhíí bighá dawahá bidag ádaant'ee. ¹³Kíh biyi' da'ch'okaqahíí biyi' dilzihgo ádaagot'eehíí nayik'ída'iziidíí hidán Bik'ehgo'ihí'nań baa hi'níilíí łahzhí' daayiyáqahíí ya' doo bídaagonoısj da née? La'íí dawahá beda'okaqahíí biká' dahi'níilgee nada'iziidíí hidán Bik'ehgo'ihí'nań áígee baa hi'níilíí łahzhí' daayiyáq áldó'. ¹⁴Áík'ehgo hadín yati' baa gozhóni yaa nadaagoln'íí da'ái yits'á'dí' yedaahinaago nohweBik'ehń bándaaqoz'aa. ¹⁵Shíí áldó' díí bee shá goz'aa ndi doo hak'i be'asdzaa da: k'adíí doo ágádaashohle' dishniigo nohwich'í' k'e'eshchii da: doo shich'í' nahi'níilgo da yati' baa gozhóni baa yasht'igo be'ansht'eehíí shits'á' náidoné' át'éé da, dahyúgohíí shiná' shizes-híi ndi nzhq. ¹⁶Yati' baa gozhóni baa nagoshni' ndi doo áí bighá ída'oshdlíi da: áí na'ídziidíí shaa det'áqahíí bighá dáshíní'ayúú áshlélhgo, yati' baa gozhóni doo baa nagoshni' dayúgo goyééhíí bee shich'í' goz'aa! ¹⁷Díí na'ídziidíí dashíí hasht'íigo ánásht'íilyúgo, bighá shich'í' nahi'níil: áídá' dashíí doo hasht'íí da ndi ashle'yúgo, díí na'ídziidíí shaa det'áqahíí bighá ashle'. ¹⁸Nt'é shich'í' nahi'níil áídá'? Díínko, Christ baa yati' baa gozhóni baa nagoshni'dá' doo áí bighá nahi'níil da, áík'ehgo yati' baa gozhóni yaa yati'íí nshłiigo, áí bighá shich'í' nahi'níilgo shá begoz'aa ndi doo be'ánásht'íí da. ¹⁹Nnee doo la' binal'a'á nshłi da ndi, nnee dawa binal'a'á nshłiigo ádeshdlaa, nnee łáágo Christ bich'í'go honshbıjıhíí bighá. ²⁰Jews daanlińíí bich'í' Jew nneehíí k'ehgo ádeshdlaa, Jews daanlíni Christ bich'í'go honshbıjıhíí bighá; Jews bich'í' begoz'aaníí yikísk'eh ádaat'eehíí k'ehgo ádeshdlaa, begoz'aaníí yikísk'eh ádaat'eehíí Christ bich'í'go honshbıjıhíí bighá; ²¹Jews bich'í' begoz'aaníí doo yikísk'eh ádaat'ee dahíí k'ehgo ádeshdlaa, begoz'aaníí doo yikísk'eh ádaat'ee dahíí Christ bich'í'go honshbıjıhíí bighá, (Bik'ehgo'ihí'nań yegos'aaníí doo bikísk'eh ánsht'ee da doo dishni da, ndi Christ yegos'aaníí be'ansht'ee.) ²²Doo daanłdzil dahíí bich'í' doo nłdzil dahíí k'ehgo ádeshdlaa, doo daanłdzil dahíí Christ bich'í'go honshbıjıhíí bighá; nnee dawa bich'í' dabíí k'ehgo á'denszi ni', dahagot'éégo la' hasdakáh doleełhíí bighá. ²³Áík'ehgo be'ánásht'íí, yati' baa gozhónihíí bighá, áí bits'á'dí' shíí áldó' nohwilgo itah shiyaa gozhóq doleełhíí bighá. ²⁴Iłhanách'idikahgee dawa hadíí iłhandeskaihíí dała'á aadilwodíí gonłnéé goz'áqahíí doo bídaagonoısj da née? Áík'ehgo daagonoıneehíí bighá nádohkeeh. ²⁵Itah nagolzéhíí dawahá bee ídaagodzaa, ch'ah **hobıjıhíí** daayoıbıjıhíí bighá. Áí ch'ah hobıjıhíí da'as'ah hichqohi ndi ágádaat'ıjıh; áídá' neéhíí doo hichqohi daahonıbıjıhíí bighá ádaahiit'ıjıh. ²⁶Áík'ehgo hayú na'ıdzogíí

hagot'éégo da'ohdlaḡa da: dilzihgo nohweBik'ehń bił da'ohsaḡá' łahyúhí ch'iidn doo hagot'éégo bił da'ohsaḡ da. ²²Ya' nohweBik'ehń nohwich'i' hashkeego ádaanzł née? Ya' née bitisgo nadaanlwod née? ²³Dawahá shá bił ch'i'otaḡa ndi doo dawa bee shich'ogo'nii da: dawahá shá bił ch'i'otaḡa ndi doo dawa shi'odla'í nłdzilgo áile' da. ²⁴Doo dakózhá nł'ehi ídáhách'ít'í' da le', áídá' nnee łá'i nł'ehi bá hách'ít'í' le'. ²⁵Dant'éhéta itsi' nanáhi'niihgee nahiniihíí daahsaḡ, hishaḡ shi, dagohíí doo hishaḡ da shi daanohsigo doo biká na'ídaadołkidgo da: ²⁶Ni'gosdzán łá'í' biká' daagolíníí dawa nohweBik'ehń bíyééhíí bigḡa dawa daahiidaḡago dábik'eh. ²⁷Nnee doo da'odlaḡa dahíí łá' shigowayú ínááyú nńáh nohwiłnii lėk'eyúgo, łá'í' akú nohwiini'yúgo, nt'éhéta nohwich'i' nniikáḡhíí daahsaḡ, hishaḡ shi, dagohíí doo hishaḡ da shi daanohsigo doo biká na'ídaadołkidgo da. ²⁸Áídá' łá', Díí hidán k'e'schín baa hi'nili at'éé, nohwiłniiyúgo, daohsaḡ hela', nohwił nagolnii' hii'ń bíḡaḡ, łá'í' ch'iyāgo doo dábik'eh da nziłhíí bigḡa: ni'gosdzán łá'í' biká' daagolíníí dawa nohweBik'ehń bíyééhíí bigḡa dawa daahiidaḡago dábik'eh: ²⁹Ch'iyāgo doo dábik'eh da nziłhíí bigḡa doo dishniiigo ádishnii da, áídá' nnee nił nagolnii' ch'iyāgo doo dábik'eh da nziłhíí bigḡa: gánńii shi, Hidán dawa shá bił ch'i'otaḡá' nt'é bigḡa łá' nnee hidán doo dawa bił ch'i'otaḡa dahíí shaa néit'í'?

³⁰Bik'ehgo'ihinań shaa ch'oba'go nt'éhéta hishaḡá'á, nt'é bigḡa ba'ihénsigo hishaḡ n'íhíí bigḡa ncho'go shaa yá'iti'? nńii shi. ³¹Áídá' gánohwiłdishnii, Da'ohsaḡee łá'í' dant'é ádaahłeehgee Bik'ehgo'ihinań ba'ihėgosí doleehíí bigḡa ádaahł'í'ł. ³²Jews daanliini' hik'e doo Jews daanlii dahíí, łá'í' Bik'ehgo'ihinań daayokaḡhgo ha'ánáłséhíí nohwiḡa nanánóhdéh hela': ³³Shíí dawa ánásht'í'łíí bee nnee dawa bił goyiłsho'q hásht'í'ł, doo dashíí zhá nł'éhíí ídáhásht'í'ł da, ndi łáni nł'éhíí bá hásht'í'ł, yee hasdádokah doleelgo.

11 ¹Shíí Christ be'esh'í'łhíí k'ehgo nohwíí áłdó' sheda'ol'í' le'. ²Shik'í'lyú, nohwa'ihédaansł, dawa bee shénádaałniihíí bigḡa, łá'í' nt'é nohwił ch'ini'áḡ n'íí dánohwił nagosisnii' hii' k'ehgo t'ah bikísk'eh ádaanoht'eehíí bigḡa. ³Áídá' díí bídaagonołsi hasht'í'ł, Christ nnee daantí'łgee yá siziiigo bitsits'inhi' k'ehgo nlii; łá'í' nneehíí isdzáné yá siziiigo bitsits'inhi' k'ehgo nlii; łá'í' áłdó' Bik'ehgo'ihinań Christ yá siziiigo bitsits'inhi' k'ehgo nlii. ⁴Nnee nłni bitsits'in doo bina'deńtsóozdá' okaḡhyúgo, dagohíí Bik'ehgo'ihinań binkááyú yałti'yúgo, bitsits'in doo yidnłsi dago ánát'í'ł. ⁵Áídá' isdzáné bitsits'in doo bina'deńtsóoz dago okaḡhyúgo, dagohíí Bik'ehgo'ihinań binkááyú yałti'yúgo, bitsits'in doo yidnłsi dago ánát'í'ł: áí isdzán bitsits'in hilzheedhíí k'ehgo at'éé. ⁶Áík'ehgo isdzán doo bitsits'in bina'deńtsóoz dayúgo bitsizil k'ínógéesh: áídá' isdzán bitsizil k'égizhgo dagohíí hilzheedgo yik'ee ídaayándziyúgo bitsits'in bina'deńtsóoz le'. ⁷Nnee nłni bitsits'in doo bina'deńtsóoz bik'eh da, Bik'ehgo'ihinań be'ılzaahíí nliigo ízisgo ye'at'ééhíí ch'i'nah áyılshíí bigḡa: áídá' isdzánhíí nnee ízisgo ye'at'ééhíí ch'i'nah áyılsi. ⁸Nnee doo isdzán bits'á'dí' alzaa da; ndi isdzánhíí nnee bits'á'dí' alzaa. ⁹Łá'í' nnee doo isdzán bá ábi'delzaa da; ndi isdzánhíí nnee bá ábi'delzaa. ¹⁰Áí bigḡa isdzán bitsits'in

bina'deñtsóoz bik'eh, áí bika' yidits'agíí bebígózhíí bigha, Bik'ehgo'ihí'nañ binal'a'a yaaká'dí' daagolíníí daabo'íhíí ałdó' bigha. ¹¹Ágát'ée ndi, nohweBik'ehñ binadzahgee nnee doo hagot'éeego hileeh da, isdzán da'áđihgo, ła'íí isdzán ałdó' doo hagot'éeego hileeh da, nnee da'áđihgo. ¹²Isdzán nnee bits'á'dí' ábí'delzaa, da'ágát'éeego nnee isdzán bits'á'dí' goleehego ábí'delzaa; ndi dawahá Bik'ehgo'ihí'nañ bits'á'dí' daaleehi ádaat'ee. ¹³Dánohwíí díí nzhogo baa natsídaahkees: ya' isdzán bitsits'in doo bina'deñtsóoz dago Bik'ehgo'ihí'nañ yokaqahíí dávik'eh née? ¹⁴Da'ádaant'eehíí bee nohwił ch'ígót'aah, nnee bitsizíl nneezyúgo yik'ee ídaayándzj. ¹⁵Áídá' isdzán bitsizíl nneezíí bee ba'olnłhi at'ée: bitsizílíí bitsits'in bik'eñłtsóoz doleełgo baa hi'né. ¹⁶Áídí' nnee ła' díí bigha ła'hadaadit'áh hádaat'íyúgo, díńko bee bił nadaagołni, ádishnii n'íí k'ehgo ádaant'ee, ła'íí Bik'ehgo'ihí'nañ daayokaqahgo ha'ánátséhíí dawa ałdó' yikísk'eh ádaat'ee. ¹⁷Áídá' díí bee nohwił nagoshnii'íí nt'éeego ánadaaht'íjł doo hagot'éeego nohwiłdishnii da, ła'ánáht'íhíí bits'á'dí' doo nt'ée daahłeeh da, da'itisgo nchq' daahłeeh. ¹⁸Dantsé baa yashti'íí díńko, ínashood da'okaqah yune' ła'ánáht'íjłgee ilts'á'yú daahohkahgo nohwa'íkonsj; áshilniihíí łazhzi' hoshłłaq. ¹⁹Hadíí da'anii da'odlaaníí nohwitahyú bebídaagozi doleełhíí bigha ilts'á'yú daahohkahíí nohwitahyú begoz'aq doo. ²⁰Dałahágee ła'ánáht'íjłgee nohweBik'ehñ doo da'anii dilzihgo bá da'ohsaq da go'íí. ²¹Áídá' da'ídaqgee dahałe dánohwíí nohwi'ídánéhi daahsaqgo nohwa'íkonsj, nnee ła' doo hwahá da'iyaa dadá: áí bigha ła' shińá' daanłj, ła'ihíí ła'ágo da'idłaq. ²²Ya' nohwigowa' nagoz'aq yune' doo da'ohsaq da gá? Dagohíí Bik'ehgo'ihí'nañ daayokaqahgo ha'ánátséhíí doo bił da'oltag da née, ła'íí nohwitahyú tédaat'iyéhíí ídaayádaandzigo ádaahłe' née? Nt'é nohwiłdishnii áídá'? Ya' díí bigha nohwa'ihénsigo yashti' doleeł gá? Dah, doo áłk'ehgo nohwaa yashti' da. ²³Nohwitahyú nashaadá' nohwił ch'ígoni'áq n'íí nohweBik'ehñ shił ch'ígon'áni at'ée, áí díńko, Jesus nohweBik'ehñ yik'edaanniihíí bíłák'edaabistjídá', da'ái bit'é'gee bán náidn'aq: ²⁴Áídí' ya'ihéńzigo oskaqadá' ilk'édaizné'ego gánniid, Nkóh, daohsaq; díí shits'í at'ée, nohwá nehestq'i: díí bee shínádaadołnłhgo ánadaaht'íjł. ²⁵Da'iyaaníí bikéđi'go da'ágát'éeego idee beda'iskaaníí náidnkaqago gánniid, Díí idee besikaaníí shidł bee áníđégo Bik'ehgo'ihí'nañ hik'e nnee biłgo łańgot'aaníí at'ée: náda'ohđłhgee bee shínádaadołnłhgo ánadaaht'íjł. ²⁶Díí k'ehgo bán nádaahđjłhgee, ła'íí díí k'ehgo idee bee náda'ohđłhgee, nohweBik'ehñ daztsaaníí ch'í'nah ádaanołsj, nádzáázhi'. ²⁷Áí bigha hadín doo godnłsj dago díí bán yiyayúgo, dagohíí díí nohweBik'ehñ bi'ide' bee idłayúgo, nohweBik'ehñ bits'í ła'íí bidił yich'i' nihesíí. ²⁸Áłk'ehgo nnee dawa ídinel'jgo zhá bán yiyaa ła'íí idee bee idłaq le'. ²⁹Hadín doo dávik'ehyú at'ée dadá' iyayúgo ła'íí idłayúgo, áí bee dabíí góyéego ích'i'godot'áál, da'anii nohweBik'ehñ bits'í doo yidnłsj dahíí bigha. ³⁰Áí bigha nohwitahyú łańi doo nadaalwod da ła'íí kaa yaa nakai, ła'íí łańi **da'ihosh**. ³¹Née da'anii ídaadinel'jł lék'eyúgo doo nohwaa yá'iti' da doleeł. ³²Áídá' nohwaa yá'iti'

lĕk'eyúgo nohweBik'ehń nohwił ch'idaago'aahgo nohwiniidaagodnısj, ni'gosdzán biká' nnee doo bił nohwił ch'ígódeeh da doleethíí bighą. ³³Áı bighą, shik'ıyú, da'ohsaągee ıła'ánáht'ııhyúgo ıłba' nasoohtąą. ³⁴Nnee ıa' shıná' silıı lĕk'eyúgo gowayú iyąą le'; áık'ehgo ıła'ánáht'ııhıı doo nohwił ch'ígódeeh da. ıa' biká nadaashıdołkid n'ıı nánsdzáągo hasht'egodeshtııfı.

12 ¹Shik'ıyú, k'adıı Holy Spirit bits'ądı' kaa hi'né'ıı hagot'éégo at'éé shıhıı bıdaagonoısjih hasht'ıı. ²Bik'ehgo'ıhi'nań doo daahohkąąh dadá' k'e'eshchıń doo yádaaktı' dahi daahohkąąhgo ch'a'onáısqá ni'ıı bıdaagonoısj. ³Áı bighą díı bıdaagonoısjih dázhó háshı'ıı, nnee ıa' Bik'ehgo'ıhi'nań biSpirit binkááyú yałtı'yúgo doo Jesus bił ch'ıgodıni at'éé niı da go'ıı; ıa'ıı nnee ıa' Holy Spirit binkááyú yałtı'yúgo zhá Jesus nohweBik'ehń nlıı, niı. ⁴Holy Spirit bits'ądı' kaa hi'né'ıı ıltah at'éé ndi Holy Spirit dała'áhi at'éé. ⁵Bik'ehgo'ıhi'nań bá na'ıdziidıı ıltah ádaat'ee ndi nohweBik'ehń dała'áhi. ⁶ıltah at'éégo nnee Bik'ehgo'ıhi'nań yá nada'iziid, ndi Bik'ehgo'ıhi'nań dała'áhi nnee bıyééhıı dawa biláhyú ıltah at'éégo na'iziid. ⁷Nnee daantıııgee Holy Spirit binkááyú na'iziidıı baa daagodet'ąą, nnee dawa bá nzhq doleelgo. ⁸Áık'ehgo ıa' Holy Spirit binkááyú yałtı' góyáni baa daagodet'ąą; ıa'ıhıı da'ái Spirit-hıı binkááyú yałtı' bee koł ıgózini baa daagodet'ąą; ⁹ıa'ıhıı odlą' bee daagodet'ąą, da'ái Spirit binkááyú; ıa'ıhıı da'ái Spirit binkááyú ná'hilziihgo baa daagodet'ąą; ¹⁰ıa'ıı godiyıhgo áná'ol'ıııgo baa daagodet'ąą; ıa'ıı Bik'ehgo'ıhi'nań binkááyú yádaaktı'go; ıa'ıı spirits hago'at'éhıhıı yıdaagotsıgo; ıa'ıı Holy Spirit binkááyú yałtı' doo bıgózı dahıı yee yádaaktı'go; ıa'ıı yałtı' doo bıgózı dahıı niigo anııhıı yaa nanádaagolıı'go baa daagodet'ąą. ¹¹Dıı dawa Spirit dała'áhi bits'ądı' kaa daahi'né', da'ái Spirit-hıı dáhat'ıııgee nnee daantıııgee yaa daagode'a'. ¹²Kots'ı dała'á ndi ıąayú henláá, ıa'ıı ıąayú henláá ndi kots'ı dała'áhi at'éé: Christ aldó' da'ágát'éé. ¹³Áık'ehgo Holy Spirit dała'áhi bee daanohwigha dała'ázhi' baptize ádaanohwi'deszaa, Jews daandliinıı dagohıı doo Jews daandlıı dahıı, isnáh daandliinıı dagohıı doo isnáh daandlıı dahıı; Holy Spirit dała'áhihi bits'ądı' daahiıdląągo ádaanohwi'deszaa. ¹⁴Kots'ı dała'áhi ıąayú henláá, doo dała'á zhá da. ¹⁵Kokeehıı, Shıı doo kogan nshıı dahıı bighą doo kots'ı itah nshıı da, niı lĕk'eyúgo, ya' doo kots'ı itah nlıı da gá? ¹⁶ıa'ıı kojaahıı, Shıı doo koıaa nshıı dahıı bighą doo kots'ı itah nshıı da, niı lĕk'eyúgo, ya' doo kots'ı itah nlıı da gá? ¹⁷Kots'ıhıı dawa koıaa nlııyúgo hagot'éégo ch'ıdits'ag? Kots'ıhıı dawa koıaa nlııyúgo hagot'éégo ich'ıchııh doo? ¹⁸Áıdá' Bik'ehgo'ıhi'nań dabıı hát'ııhıı k'ehgo kots'ı ıąayú henlááhıı daanné'gee kots'ı bee hadaadeszaa. ¹⁹Kots'ı bits'ádaadehezlaahıı dała'áyúgo, hagot'éégo its'ı hıleeh áıdá'? ²⁰Áıdá' kots'ı ıąayú henláá ndi kots'ıhıı dała'áhi. ²¹Áık'ehgo koıaaahıı doo hagot'éégo koganhıı, Doo hánesht'ıı da, yiıııh da; ıa'ıı kotsıts'ınhıı doo hagot'éégo kokeehıı, Doo hánesht'ıı da, yiıııh da. ²²Doo ágát'éé da, kots'ı ıąayú henlááhıı doo nalwod da ngolııhıı ákone' itah nlııgo zhá kots'ı gólıı; ²³Nohwıts'ı ıąayú henlááhıı ıa' dá'ıch'ı'go baa natsıdaahiıkees ndi, áı ıa'ıhıı

bitisgo nnt'éeego bił da'ónltag; nohwits'í łąąyú henlááhíí doo hagot'éeego nel'íí bígonedząą dahíí dayúwehyú nnt'éeego bił da'ónltag. ²⁴Áídá' nohwits'í łąąyú henlááhíí daadilkqohyú hit'íigo alzaahíí doo bił da'ónltag da: áídá' Bik'ehgo'ihí'nań dawa dała' ładaayiznil, doo bił da'ónltag dahíí dabíí nnt'éeego áyłsı; ²⁵Áık'ehgo nohwits'í łąąyú henlááhíí doo ilk'edaadi'niih da doleeł; áídá' nnt'éeego ádaahtılzı doleełgo Bik'ehgo'ihí'nań dała'ázhi' ładaayiznil. ²⁶Áık'ehgo dała'á biniigonnt'ée lęk'eyúgo dawa yił biniidaagonłt'ée; dagohíí dała'á daach'idnłsı lęk'eyúgo dawa yaa bił daagozhqó doleeł. ²⁷Áık'ehgo nohwíí itah Christ bits'í daanohtłjı, łá'íí dała'á daanohtłjıgee łąąyú henlááhíí daanohtłjı. ²⁸Bik'ehgo'ihí'nań díí k'ehgo ínashood daanliiníí bitahyú nyiínłil lęk'e, dantségee bindaal'a'á daanłjigo, nakigeehíí binkááyú yádaakti'go, taagigeehíí ilch'ígó'aahgo, iké'geehíí godiyłhgo áná'ol'ıjłgo, ná'ilziihgo, ich'onıigo, nant'án daanłjigo, łá'íí Holy Spirit binkááyú yati' doo bígózi dahíí yee yádaakti'go. ²⁹Ya' dawa Bik'ehgo'ihí'nań bindaal'a'á daanłjı née? Ya' dawa binkááyú yádaakti' née? Ya' dawa ilch'ígó'aahíí daanłjı née? Ya' dawa godiyłhgo ánáda'ol'ıjł née? ³⁰Ya' dawa nná'daahlilziihgo baa godet'aą née? Ya' dawa Holy Spirit binkááyú yati' doo bígózi dahíí yee yádaakti' née? Ya' dawa nt'é niigo anıfłhíí yaa nanádaagolni'go baa godet'aą née? ³¹Áídá' Holy Spirit bits'á'dł' kaa hi'né'íí itisgo at'éehíí zhá hádaaht'ıj le': áídł' díńko itisgo ágot'éhi nohwıl ch'ı'nah ágóshłéh.

13 ¹Nnee daanliiníí nnt'éeego yádaakti'íí łá'íí Bik'ehgo'ihí'nań binal'a'á yaaká'yú daagolniihíí biyati' bee yashti'sha' ndi, shı'ıjónnıí da'ádıhyúgo bésh dilwoshé áhiłts'agıí, dagohıí bésh be'idot'até łidiildıłgo áhiłts'agıí k'ehgo ánsht'ee. ²Bik'ehgo'ihí'nań shinkááyú yałti'ıí shaa godet'aąsha' ndi, nt'é doo bígózi da n'ıí dawa bígonsısha' ndi, dawa shıł ígózi'sha' ndi, łá'íí shı'odłá'ıí bee dził lášhi godihı'nıił lęk'e ndi, shı'ıjónnıí da'ádıhyúgo shıí doo nt'é nshłjı da. ³Dawa shıyéehıí tédaat'iyéhıí baa hishnıfłsha' ndi, łá'íí shidi'dıldıgo baa ídinsht'aą lęk'e ndi, shıł jıónnıí da'ádıhyúgo shıí doo nt'é bee hisht'ıj da. ⁴Koł jıónnıí nyéé lęk'e ndi nızaadzhi' bidag ách'ıt'ée, łá'íí koł goch'oba'; łá' bıyéehıí doo ídáhách'ıt'ıj da; doo ída'ch'odłıí da, doo ích'idilkąąh da, ⁵Koł jıónnıí doo nch'ogo ách'ıt'ıj da, doo dashızhá ch'inzi da, doo dágóshch'ı' bągoch'ıłchıj da, doo dénch'óego baa nats'ıtsikees da; ⁶Doo nch'ogo ágot'eehıí baa koł gozhqó da, áídá' da'anıi ágot'eehıí zhá baa koł gozhqó; ⁷Dawa bidag ách'ıt'ée, dawa ch'odłąą, nnt'éeehıí dawa nch'ołıí, dawa bich'ı' dahch'idnłdqh. ⁸Koł jıónnıí doo ádıfłh da: yunáásyú ágone'ıí baa nagolni' lęk'e ndi bech'ıgonáh; Holy Spirit binkááyú yati' doo bígózi dahíí bee yách'ıłti' lęk'e ndi bengowáh; bee koł ígózinıí bech'ıgowáh. ⁹K'adıí łahzhi' zhá bídaagonłzi, hik'e yunáásyú ágone'ıí łahzhi' zhá baa nadaagohiılni'. ¹⁰Áídá' Bik'ehgo'ihí'nań ngonłchıfłhıí dawa łalzaagee, doo dayúweh łahzhi' zhá bídaagonłzi da doo, áídá' dawa nohwıl ídaagozi doleeł. ¹¹Chągháshé nshıjıdá' chągháshé k'ehgo yashti' ni', chągháshé k'ehgo doo gonsáą dago natséskees ni': áídá' nnee sıłıí

hik'e chagháshé k'ehgo ánsht'ee n'íi shits'á' bee yó'ogoyáá ni'. ¹²K'adyúgo kát'íné doo nzhqoogo biyi' got'íi dahíi biyi' daadet'íihíi k'a'at'éeé, áidá' biká' ngonyáágo daalinél'íihíi k'ehgo nzhqoogo got'íi doleel: k'adyúgo łahzhí' zhá bigonsi, áidá' biká' ngonyáágo dawa bigonsi doleel, dashíi shigózíihíi k'ehgo. ¹³Áik'ehgo ki'odla', hik'e nlt'ééhíi nch'ohołíihíi, ła'íi koł ijóóníi biłgo, díi taagihíi begoz'aq; ndi koł ijóóníi itisgo at'éeé.

14 ¹Íi ijóóníi be'adaanoht'eego biká' hádaaht'íi, ła'íi Holy Spirit bits'á'dí' kaa hi'né'íi hádaaht'íi, ndi Bik'ehgo'ihí'nań nohwinkááyú yałti'íi itisgo hádaaht'íi. ²Hadín Holy Spirit binkááyú yati' doo bigózi dahíi yee yałti'íi doo nnee yich'í' yałti' da, ndi Bik'ehgo'ihí'nań zhá yich'í' yałti': nnee doo ła' yígółsi dago; áidá' doo bigózi dahíi biyi'siziiníi yee yaa yałti'. ³Áidá' hadín Bik'ehgo'ihí'nań binkááyú yałti'íi nnee yich'í' yałti', nnee bi'odla' nđzilgo áile' doleelgo, ła'íi yidag yałti'go, ła'íi yił goyiłshóógo ánádaahidle'go. ⁴Hadín yati' doo bigózi dahíi yee yałti'íi dabíi bi'odla' nđzilgo áile', áidá' Bik'ehgo'ihí'nań binkááyú yałti'íi ínashood ha'ánáshéhíi bi'odla' nđzilgo ádaile'. ⁵Daanohwigha Holy Spirit nohwinkááyú yati' doo bigózi dahíi yee yałti'go hádaanohwisht'íi, ndi Bik'ehgo'ihí'nań nohwinkááyú yałti'íi itisgo nohwá hást'íi: hadín Bik'ehgo'ihí'nań binkááyú yałti'íi hadín yati' doo bigózi dahíi nt'é niigo aníihíi yaa nanágołni'yúgo zhá nlt'éeé, ínashood ha'ánáshéhíi bi'odla' nđzilgo áile' doleelhíi bigha. ⁶Shik'íyú, Holy Spirit shinkááyú yati' doo bigózi dahíi yee yałtigo nohwaa níyááyúgo, doo nt'é bigonołsih at'éeé da, Bik'ehgo'ihí'nań shíł ch'í'nah áyíllaahíi nohwił ch'í'nah ádaashle'yúgo zhá, dagohíi bigonsihíi nohwił nagoshni'yúgo zhá, dagohíi Bik'ehgo'ihí'nań shinkááyú yałti'yúgo zhá, dagohíi nohwił ch'ígonsh'aahyúgo zhá. ⁷Be'idaadot'áleé, ái tsisólta ła'íi béshts'qoséta, doo daahinaa da ndi aníihíi dits'ag, áidá' doo áígee aníi dayúgo, hagot'éégo nt'é idot'áleéhíi bídaagoch'íłsi? ⁸Ła'íi siláada bibéshdilwoshé doo áígee aníi dayúgo, hadínsha' nagonłkaadhíi bigha ilch'í'ídidle'? ⁹Nohwihíi ágádaanoht'ee, yati' doo bigózi dahíi bee yádaaltí'yúgo, hagot'éégo nt'é daadohniihíi yádaagołsi doleel? Daazhógo da'ilijzhí' yádaaltí'. ¹⁰Ni'gosdzán biká' yati' iltah at'éégo doo áłch'íde da sha' ndi, dawa bigózigo yádaaltí'. ¹¹Áik'ehgo yati' doo bigonsi dayúgo, nnee aníihíi nnee łahgo hadaazt'í'híi k'ehgo bich'í' ánsht'ee doleel, ła'íi da'áik'ehgo shich'í' at'éeé doleel. ¹²Áik'ehgo nohwíi Holy Spirit bits'á'dí' kaa hi'né'íi dázhó hádaaht'íigo, ínashood ha'ánáshéhíi bi'odla' nđzilgo ádaile'íi itisgo hádaaht'íi, áik'ehgo bee nada'ohsiid. ¹³Áik'ehgo hadín Holy Spirit binkááyú yati' doo bigózi dahíi yee yałti' lək'eyúgo, nt'é niigo aníihíi yaa nanágołni'híi bigha okaqah le'. ¹⁴Yati' doo bigózi dahíi bee oshkaqah lək'eyúgo, shiyi'siziiníi okaqah ndi nt'é dishniigo ádishniihíi doo bigonsi dago, doo shiini' bee oshkaqah da. ¹⁵Hagolá ashne' áidá'? Shiyi'siziiníi bee oshkaqah, ła'íi bigonsigo oshkaqah áldó'; shiyi'siziiníi bee idish'aał, ła'íi bigonsigo áldó' idish'aał. ¹⁶Dagohíi niyi'siziiníi zhá bee Bik'ehgo'ihí'nań ba'ihénziyúgo, nnee Christ doo hwahá nlt'éégo yígółsiđ

dahíí onkàqahgo ànniihíí doo yígòtsì dadá', hagog'éeego, Da'anii doleelgo at'ée, nii doleel? ¹⁷Nht'éeego ihénnzìgo onkàqah ndi nidits'agíí doo bich'odaasínni' da. ¹⁸Daanohwigha nohwitìsigo Holy Spirit shinkááyú yati' doo bigózi dahíí yee yałti'go Bik'ehgo'ihì'nań ba'ihénsi: ¹⁹Ágát'ée ndi ínashood ha'ánátséhgee goneznán doo náhóltag dayú yati' doo bigózi dahíí bee yashti'shà' ndi, yati' ashdla' yídaagołsiníí nnee ła' bee bił ch'ígonsh'aahíí bighà bee yashti'íí itisgo shił nht'ée. ²⁰Shik'ííyú, nohwił ídaagozi zhinéego doo chagháshé k'ehgo zhà be'ádaanoht'ee da le': áídá' nchò'íí zhinéego mé'híí k'ehgo be'ádaanoht'ee, nohwił ídaagozi zhinéego nnee báyań daasilíihíí k'ehgo be'ádaanoht'ee le'. ²¹Bik'ehgo'ihì'nań yegos'aaníí biyi' gáníigo bek'e'shchíí, Nnee biyati' łahgo at'éhi, ła'íí nnee nanidí'íí biyati' bee díí nneehíí bich'í' yashti' doo; ágát'ée ndi doo daashidits'ag da doleel, nii, nohweBik'ehń. ²²Áík'ehgo Holy Spirit binkááyú yati' doo bigózi dahíí godiyihgo be'ígóziníí át'ée, áí da'odlaaníí doo bá alzaa da, áídá' doo da'odlqà dahíí bá alzaa: ndi Bik'ehgo'ihì'nań binkááyú yati'íí doo da'odlqà dahíí doo bá alzaa da, áídá' da'odlaaníí bá alzaa. ²³Áík'ehgo ínashood dawa ła'adzaadá' dawa yati' doo bigózi dahíí yee yádaakti' lèk'eyúgo, ła'íí nnee ła' Christ doo hwahá nht'éeego yídaagołsìid dahíí, dagohíí doo da'odlqà dahíí hah'ákaiyúgo, Nohwiini' ádaadih, daanohwiłnii doleel go'íí. ²⁴Áídá' dawa Bik'ehgo'ihì'nań binkááyú yádaakti' lèk'eyúgo, ła' nnee doo odlqà dahíí, dagohíí Christ doo hwahá nht'éeego yígòtsìid dahíí hah'ayááyúgo, binchò'íí bił ch'í'nah áile', ła'íí yá'iti'íí yidezts'aqahíí bighà ídinél'íí doo: ²⁵Áík'ehgo bijíí biyi' nainł'í' n'íí ch'í'nah áyílaago, Bik'ehgo'ihì'nań yich'í' hishzhiihgo yokaqah doleel, Da'anii Bik'ehgo'ihì'nań nohwił nlii ła, niigo. ²⁶Hagolá ádaahne' áídá', shik'ííyú? ła'ánáht'íihgee daanohtíígee ła' ido'aał, ła' íłch'ígó'aah, ła' Holy Spirit binkááyú yati' doo bigózi dahíí yee yałti, ła' bił ch'í'nah ágółzigo yaa nagolni', ła' yati' doo bigózi dahíí nt'é niigo anííhíí yaa nanágołni'. Áí dawa ínashood ndzilgo nazíí doleelhíí bighà ánádaaht'ííł le'. ²⁷Nnee ła' yati' doo bigózi dahíí yee yádaakti' lèk'eyúgo, naki dagohíí taalt'éeego zhà begoz'aq, áí bitisgo dah, dáłiké'go yádaakti' le'; ła'íí nt'é niigo anííhíí dała'a yaa nanágołni' le'. ²⁸Áídá' nt'é niigo aníihíí yaa nanágołni'íí doo hak'í dayúgo, doo yádaakti' dago nht'ée, ha'ánázéh yune', ích'í' yádaakti'go zhà, ła'íí Bik'ehgo'ihì'nań yich'í' yádaakti'go nht'ée. ²⁹Bik'ehgo'ihì'nań binkááyú yádaakti'íí naki dagohíí taalt'éeego yádaakti' le', ła'ihíí nt'é daaniigo yádaakti'íí yaa natsídaakees le'. ³⁰Ła' itah dahsdaahíí nt'éhéta Bik'ehgo'ihì'nań bits'á'dí' bił ch'í'nah alzaayúgo, dantsé yałti'íí dant'éheego at'ée le'. ³¹Áík'ehgo daanohwigha Bik'ehgo'ihì'nań nohwinkááyú yałti'íí nohwá bił ch'í'otaq, dáłiké'go, daanohwigha bídaagono'aał doleelgo, ła'íí daanohwigha nohwił daagoyíłshóq doleelgo. ³²Bik'ehgo'ihì'nań binkááyú yádaakti'íí ídaa daagodzàago dáłik'eh. ³³Godikishíí doo Bik'ehgo'ihì'nań bits'á'dí'hi at'ée da, áídá' nkegohen'áaníí zhà, Bik'ehgo'ihì'nań bá hadaadeszaahíí, ínashood daanliinií, ha'ánátséhgee ágágot'ee. ³⁴Ha'ánázéh yune' isdzané

dant'éheego ádaat'ee le': doo ákóne' yádaalti' dago bágoz'aa; da'dits'ago bágoz'aa, begoz'aaníí áldó' ánííhíí k'ehgo. ³⁵Dant'éhéta yídaagoł'aa haádaat'íiyúgo yił nadaanneehíí gowayú nayídaadiłkid le': isdzané ha'ánázeh yune' yádaalti'yúgo bik'e' ídaayágosj. ³⁶Ya' ádishñiihíí doo nohwíł dábik'eh da née? Ya' Bik'ehgo'ihí'nań biyati'íí nohwíí nohwits'áđí' begodeyaahi daanoħsj née? Dagohíí dánohwízhá nohwaa hi'né'i daanoħsj née? ³⁷Nnee la' Bik'ehgo'ihí'nań shinkááyú yałti', dagohíí Holy Spirit be'ánsht'ee nziyúgo, nohwich'í' k'e'eshchiihíí nohwe Bik'ehń yegos'ánihi at'ééhíí yígółsj doleeł. ³⁸La' nnee díí doo yígółsj háł'íí dahíí, dayúwehégo doo yígółsj da le'. ³⁹Áłk'ehgo shik'íiyú, Bik'ehgo'ihí'nań nohwinkááyú yałti'íí dážhó hádaaht'íí, la'íí Holy Spirit nohwinkááyú yałti' doo bígózí dahíí bee yałti'íí dah doo daabiłdoħnii da. ⁴⁰Ha'ánázeh yune' doo godikish dago la'íí iłch'íí daagodinółsigo goz'aaníí k'ehgo ánadaaht'íí le'.

15 ¹K'adıí shik'íiyú, yałti' baa gozhóni nohwich'í' baa nagosisni' n'íí nohwíł ch'í'nah ánánáshdle'; áí nágodoh'aa n'íí, áí bee ndaasozi; ²Da'ái bee hasdánohwidi'ñiił, baa nohwíł nagosisni' n'íí bínádaałñiihgo daahonohta'yúgo; doo ágádaanoht'ee dayúgo doo da'aniigo da'osoħdłaađ da. ³Yałti' shaa hi'né'íí itisgo at'éhi nohwaa daasiné' ni', gánohwiłdéniiđgo, Christ nohwinchó'híí bighá daztsaa, Bik'ehgo'ihí'nań biyati' bek'e'eshchiini' k'ehgo; ⁴Áđí' łehiiltíí, taagi hileehíí bijii naadiidzaa, Bik'ehgo'ihí'nań biyati' bek'e'eshchiini' k'ehgo. ⁵Áđí' **Céphas** bo'íí lėk'e, áđí' binal'a'á nakits'adahíí áldó' daabo'íí lėk'e: ⁶Áí bikédí'go nohwik'isyú, ínashood daanłnihi'í, ashđla' gonenadín bitisyú dała' daabo'íí lėk'e; áí dásdozhá dawa díí jii t'ah daahinaa, áđá' la' **da'ılhaazh**. ⁷Áí bikédí'go James bo'íí lėk'e; áđí' nadaal'a'á dawa áldó'. ⁸Da'iké'yú shíí áldó' hiłtsaa ni', doo gonshteeh dagee gosilłíhíí k'ehgo. ⁹Nadaal'a'á dawago shíí doo bił ótag dahíí nshíí, nal'a'híí k'ehgo doo shido'jii bik'eh da, Bik'ehgo'ihí'nań daayokaąhgo ha'ánáłséhíí góyéego bich'í' nagosh'áá lėk'ehíí bighá. ¹⁰Bik'ehgo'ihí'nań biłgoch'oba'íí bee ánsht'eehíí k'ehgo ánsht'ee: biłgoch'oba'íí bee shaa godet'aaníí doo daazhógo shainé' da; áđá' da'des'a'íí dawa bitisgo nyeego nasízíid: áđá' doo shíí áshł'íí da, Bik'ehgo'ihí'nań biłgoch'oba'íí shił nliini' át'íí. ¹¹Ágát'éé ndi shíí dagohíí la' da'des'a'íí nohwich'í' yádaalti' ndi, díí k'ehgo yádaahiilti'go da'osoħdłaađ. ¹²Christ daztsaađí' naadiidzaago baa na'goni'dá, hagot'éégo nohwitahyú la', nanezna'íí doo naadikáh da, daadoħnii? ¹³Nanezna'íí doo naadikáh dayúgo Christ doo naadiidzaa da: ¹⁴La'íí Christ doo naadiidzaa dayúgo, nohwíł nadaagohiilni'íí doo ilłí da silłí, la'íí nohwi'odłá'íí áldó' doo nt'é da silłí. ¹⁵Nanezna'íí doo naadikáh dayúgo Bik'ehgo'ihí'nań doo Christ naadiidzaago áyíłaa da, áłk'ehgo Bik'ehgo'ihí'nań baa łéda'ilchoogo nohwígózi, Bik'ehgo'ihí'nań Christ naadiidzaago áyíłaa, daan'ñiihíí bighá. ¹⁶Nanezna'íí doo naadikáh da lėk'eyúgo, Christ áldó' doo naadiidzaa da: ¹⁷La'íí Christ doo naadiidzaa dayúgo, nohwi'odłá' doo ilłí da; áłk'ehgo nohwinchó'íí t'ah biyi' nahkai. ¹⁸Áłk'ehgo Christ bił dał'a'á daanłjigo **da'ılhaazhíí** áldó' ch'a'ondéeh.

19Dadíí ni'gosdzán biká'gee daahin'naago zhá Christ bee nlt'éégo ágot'eehíí ndaahóndliiyúgo, néé nnee dawa bitisgo dénohwaagoch'oba'é. 20Áída' da'anii Christ daztsaądí' naadiidzaa, **da'ihhoshíí** bitahdí' dantsé naadiidzáhi nlii. 21Áík'ehgo nnee dała'á biláhyú da'itsaahi bengonyááhíí k'ehgo nnee dała'á biláhyú nanezna' n'íí naadikáh doo. 22Adam bits'ądí' nnee dawa nanne'híí k'ehgo Christ bił dała'á daanliiníí dawa nadaahi'naa doleeł. 23Áída' nnee dała'á daantíígee naahikáh doleeł, Christ dantsé naadiidzaahíí nlii; áí bikédí'go Christ daabiyéehíí ałdó' naadikáh, dabíí nádzáágo. 24Nadaant'aahíí dawa, la'íí yedaabik'ehgo binawod daagolíí n'íí dawa Christ da'ííli yłchiihíí bikédí'go, án bilakt'áhgee begoz'ąą n'íí biTaa, Bik'ehgo'ihí'nań, yainadí'aahdá' goldohíí bengodogaal. 25Christ be'ina'íí dawa bikelt'ááh nni'nılzhí' yebik'eh doleeł at'éé. 26Da'iké'yú be'ina' da'ííli yłchiihíí áí da'itsaahi. 27Bik'ehgo'ihí'nań dawahá Christ bikelt'ááhzhí' nyinnil. Áída', Dawahá bikelt'ááhzhí' nni'nıl, niidá' hadín bikelt'ááh dawahá nyinnilíí doo itah nlii dahíí nlt'éégo bígozi. 28Dawahá biyahzhí' alzaadá, Bik'ehgo'ihí'nań dawahá biYe' biyahzhí' áyíílaa n'íí biYe' ałdó' dabíí biyahzhí' ádedlaa, áík'ehgo Bik'ehgo'ihí'nań dawa yebik'eh doleeł. 29Doo ágát'éé dayúgo, daztsáni bá baptize ádaabi' — dilne'íí nt'é bighą ádaat'íi? Nanezna'íí doo naadikáh dadá' nt'ésha' bighą bá baptize ádaabi'dilne'? 30La'íí nt'ésha' bighą dawa jii da'o'aalgee négodzidíí bidahzhí' nasiidzi? 31Shik'ííyú, Christ Jesus biláhyú nohwee shił gozhóqíhíí bighą gánohwıłdishnii, Dawa jii da'itsaahíí bee shich'í' goz'ąą. 32Nnee ni'gosdzán biká' zhıneehee'íí yádaakti'híí k'ehgo yashti'go gádishnii, Dziłká'yú bégódzidi daagolíníí Ephesusgee bił nadaagonskhaad lęk'eyúgo, nt'é bee hisht'íi, nanezna'íí doo naadikáh dadá'? La' gádaanii, Halaą da'idaą le', da'idlaą le': hiskáą dahiitsaahíí bighą. 33Nohwich'í' nadoch'aa hela'; nnee daanchó'ihíí bił nach'ikaiyúgo nlt'éégo ách'ıt'ééhíí yłchóq. 34Ch'ínádaanozdziid, nlt'éégo ihí'naahíí baa nánohkáh, nchó'go ánádaahne' hela'; nohwitahyú la' Bik'ehgo'ihí'nań doo yıdaagołsi da: bik'ee ıdaayádaanozdzi doleełhíí bighą ádaanohwıłdishnii. 35Áída' nnee la' na'ıdaadiłkid, Hagot'éégo nanezna' n'íí naadikáh? Bits'í hago'at'éhi yee naadikáh doleeł? daaniiigo. 36Ni, nnee doo gonyáni, nt'éhéta k'edínlaahíí ntsé datsaahíí k'ehgo alne'yúgo zhá hajéeh: 37Hant'é hajéedíí doo áí ga'at'éhi k'edínlaa da, k'edilzıí zhá k'edínlaa, t'oh naghái dagohíí łahgo at'éhinhí shı: 38Hant'é hajéedíí Bik'ehgo'ihí'nań dabíí hát'ííyú áile', áík'ehgo k'edilzıí dała'á n'ąągo hajéedgo ıłtah at'éégo ánołigo áile'. 39Its'í doo dawa łekt'ee da: la' nnee bits'í, la'íí dawahá nadaakaihíí, la'íí łóg, la'íí dló' ałdó'. 40Its'í la' yaaká'yú daagolíí, la'ihíí ni'gosdzán biká' daagolíí: yaaká'yúhíí be'ızisgo at'éhi doo ni'gosdzán biká'yúhíí be'ızisgo at'éhi łekt'ee da. 41Ya'ái dásahngo bits'ą'dindláád, t'é'gona'ái dásahngo ałdó' bits'ą'dindláád, ts'ıłsqósé dásahngo bits'ą'dindláád; ts'ıłsqósé dała'á n'ąągo łahgo at'éégo bits'ą'dindláád. 42Nanezna' n'íí naadikáhíí ałdó' ágát'éé. Its'í k'edilzıí k'ehgo łehi'né'íí hichóq, its'í łahgo at'éhi yee naadikáh, doo daahichóqhi da. 43Its'í doo ıłłigo

lehi'né' n'íí ízísigo at'éégo nádidáhgo alne': doo nalwodgo lehi'né' n'íí binawod golíígo nádidáhgo alne'. ⁴⁴Dá ni'gosdzán biká'gee kots'íhíhíí lehi'né' n'íí yaaká'dí'go kots'íhíhíí bee nách'ididáh. Kots'í ni'gosdzán biká'gee golíí, la'íí yaaká'dí'go kots'í golíí. ⁴⁵Gáníígo bek'e'eshchíí, Dantsé nnee alzaahíí Adam holzéhi hinaa silíí; Adam iké'yúhíí spirit be'íhi'naahíí silíí. ⁴⁶Áídá' its'í yaaká'dí' gólííníí doo ntsé begonyáá da, ndi its'í ni'gosdzán biká' gólííníí ntsé begonyáá, áníita its'í yaaká'dí' gólííníí begonyáá. ⁴⁷Dantsé nnee alzaahi ni'gosdzán bits'á'dí' nlií, leezh bee alzaa: iké'gee nneehíí yaaká'dí' nyáá, án nohweBik'ehń nlií. ⁴⁸Ni'gosdzán biká' nnee leeze be'ádaaszaahíí, dantsé nnee leeze be'alzaahíí k'ehgo ádaat'ee: la'íí yaaká'yú daagolíníí, nnee yaaká'dí' nyááhíí k'ehgo ádaat'ee. ⁴⁹Nnee leeze be'alzaahíí k'a'ádaandlíggo daagosiidliíhíí k'ehgo yaaká'dí' nnee áldó' k'a'ádaandlií doleeł. ⁵⁰Shik'íyú, díí nohwił nagoshni', nnee daanliiníí bits'í hik'e dił biłgo Bik'ehgo'íhi'nań bilatt'áhgee daanliiníí doo itah daaleeh da; its'í nanne' doleełíí íhi'naa doo ngonel'aa dahíí doo bíyéé daaleeh at'éé da. ⁵¹Isaa, doo bígózí da n'íí nohwił ch'í'nah ashle'; doo daanohwigha **da'ilwosh** da doleeł, áídá' lahgo ádaant'eego ánohwi'dilne' doleeł, ⁵²Dagoshch'í, ch'inesk'ołń k'ehgo, iké'yú béshdilwoshé ánniidgee: béshdilwoshé áńíí doleeł, la'íí nanezna' n'íí its'í doo hichqohíí bee naadikáhgo ádolniíł, la'íí néé lahgo ádaant'eego ánohwi'dilne' doleeł. ⁵³Díí its'í hichqohíí its'í áníidéhi doo hichqoh dahíí ik'eyidleeh doleeł, la'íí díí its'í datsaahíí its'í áníidéhi doo datsaah dahíí ik'eyidleeh doleeł. ⁵⁴Áík'ehgo díí its'í hichqohíí doo hichqoh dahíí ik'eyidlaago, la'íí díí its'í datsaahíí doo datsaah dahíí ik'eyidlaago, gáníígo bek'e'eshchiiníí begolne' doleeł, Da'itsaah n'íí baa goneznaago doo nt'é da silíí. ⁵⁵Da'itsaahíí rílni, ninawod bee nohwicháq n'íí hayú begoz'aa? Da'itsaahíí rílni, gonłnéé n'íí hayú goz'aa? ⁵⁶Nohwincho'híí bighá da'itsaahíí nalwod; la'íí begoz'aaníí biláhyú ncho'íí nalwod. ⁵⁷Áídá' Bik'ehgo'íhi'nań ba'ihégoši, án nohweBik'ehń Jesus Christ biláhyú da'itsaahíí baa daagonłnééhgo ánohwile'. ⁵⁸Áí bighá, shik'íyú, shił daanohshóni, ndzilgo nasozíí, doo bits'á' daadiho'náhgo da, da'ákozhá lággo nohweBik'ehń bá nada'ohsiid, nohweBik'ehń biláhyú bá nada'ohsiidíí doo da'ílnéhi at'éé dago bídaagonłńhíí bighá.

16 ¹K'adíí nnee Bik'ehgo'íhi'nań báhadaadeszaahíí zhaali bá ndaahohniíhíí bee nohwich'í' yashti': Galatiayú ínashood ha'ánáséhíí gábíłdishnií n'íí k'ehgo nohwił áldó' ágádaahne'. ²Godilziníí bijíí dábik'ehń dałá'á nohtíígee Bik'ehgo'íhi'nań danelt'eego bee nohwich'ozni'híí k'ehgo zhaali la' k'ihzhí' ndaahohniíłgo iłch'í' ndaahohniíł, áík'ehgo níyáágee doo zhaali ndaahohniíł da doleeł. ³Áík'ehgo akú níyáágo nnee la' nzhqo daadohniíhíí naaltsoos baa daanohniíł, áí zhaali baa daasoné'íí Jerusalemyú daidiiné'híí bighá akú daadish'aał. ⁴Shíí áldó' akú disháh dábik'ehyúgo, akú bił dishkah. ⁵Macedóniayú ch'ínsháh shí: Macedóniayú ch'íníyáágo nohwaa deshaal. ⁶Akú déł'ihézhí' nohwił nahashtá shí, dagohíí da'akú sheehai shí, áík'ehgo dahayú dahnáádishdáhyú

bee shich'odaahnii doleeł. ⁷Akú ch'ínsháhgo doo dét'ihézhí' nohwistsééh hásh't'íí da, áídá' nohweBik'ehń hát'ííyúgo nohwił nahashtá hásh't'íí. ⁸Pentecost bengonyáázhi' Éphesusgee siidáa doo. ⁹Nt'éégo na'isiidíí dahot'éhé bee shá ch'íntáá, ła'íí shich'í' nadaagonłkaadíí łáá. ¹⁰**Timótheus** nohwaa nyáágo doo neldzidgo ádaanołsı da le': nohweBik'ehń binasdziidíí nayik'í'iziid, shíí na'isiidhíí k'ehgo. ¹¹Doo hadín da'ílinégo baa natsekees da le': áídá' bich'odaahniiigo bił gozhóqo shich'í' dowáh: bíí hik'e shik'isyú ła' ałdó' shaa hikáhíí nhoshłíí. ¹²Nohwik'isn Apollos holzéhi, nohwik'isyú ła' biłgo nohwaa hikáh dážhó hásh't'íí ndi k'adyúgo doo digháh hát'íí da; ndi bá ch'ígót'ı' gozlíigo nohwich'í' digháh ndi at'éé. ¹³Daadeh'íí, nohwi'odłá'íí bee ndzilgo nasozıı, báyán k'ehgo ádaanoht'ee, nadaatwodgo nadaasozıı le'. ¹⁴Dawa ánadaaht'ııhıı hił daanojhııgo ánadaaht'ııhıı le'. ¹⁵Shik'ííyú, Stéphanas bigowa dágoz'ąą nt'éégo Akéyagee dantsé da'osdłáıdgo bıdaagonłsı, ła'íí ínashood daanliiníí yinádaadéz'ııgo yaa ádaadest'ąą, ¹⁶Nıee ágádaat'eehíí hik'e nohwich'odaaniihıı, ła'íí Bik'ehgo'ihı'nań bánada'iziidíí dawa daadohts'ago nánohwoshkąąh. ¹⁷Stéphanas hik'e Fortunátas ła'íí Akéyas hikaihıı baa shıł gozhóq: nohwıı doo nohkáh dagee áı hikai. ¹⁸Shiyı'siziinıı hanáyoyłgo ádaashiilaa, ła'íí nohwıı ałdó' ágádaanohwislaa: nıee ágádaat'eehıı daadinołsıgo ba'ihédaanohsı. ¹⁹Asiagee ínashood ha'ánátséhıı dawa, Gozhóq, daanothwiłnii. Áquila hik'e Priscılla ła'íí bigowa yune' ha'ánátséhıı ałdó' dawa nohweBik'ehń binkááyú, Gozhóq, daanothwiłnii. ²⁰Christ biláhyú nohwik'ííyú daanliinıı dawa, Gozhóq, daanothwiłnii. Daagodinołsıgo daatłhts'qs le'. ²¹Shıı, Paul, Gozhóq, nohwiłdishniihıı dashıı shigan bee k'eshiłchıı. ²²Nıee ła' doo Jesus Christ nohweBik'ehń bił nzhqo dayúgo, bił ch'ıgodıni at'éé. NohweBik'ehń nánídáh. ²³Jesus Christ nohweBik'ehń biłgoch'oba'ıı bee nohwił goz'ąą le'. ²⁴Christ Jesus binkááyú shıł ijóonıı bee nohwich'ı' goz'ąą le'. Doleetgo at'éé.